

# CONTEMPLATIO GEMMARUM QUARUNDAM DACTYLIOTHECÆ GORLAEI,

*Bibliotheca per Ante Biennium Coll. Nov. Soc. Typ.  
& auctæ, & illustratæ:*

Instituta

à

LAURENTIO BEGERO,

Serenissimi Electoris Brandenburgici Consiliario  
ab Antiquitatibus & Bibliotheca.



*Colonia Brandenburgica,*

Imprimebat ULRICUS LIEBPERTUS, Electoral. Typographus. 1697.



7.

Cupido in alterius tergum volasse, cum superasse, & per aërem abducere cernitur. Id eò tutius forsan Tibi videberis facere, respondit DULODORUS, quò clarius poma Amoribus propria fuisse, etiam Coluthus cecinit:

*Μῆλον κίερος ἐστὶν ἑρώτων*

inquit de Raptu Helenæ. Hæc autem utat sint, mihi tamen, quod de Amore Cælesti, Plebejum à terrenis sordibus abstrahente dixi, magis placeret; Licet enim auctoritate destituar, non tamen destituor ratione, cum lasciviam amantis, Amati virtute corrigi, nec incongruum sit, nec insolitum. In Gemma 10. videntur

## MERCURIUS & MINERVA

ΘΕΟΙ ΠΙΠΟΝΑΟΙ.



Mihi alia sententia placet, respondit ETASTES; Mercurius & Pallas hic exhibentur, quasi hæc Atticam terram irrigare constituens, Jovis jussu per Mercurium prohiberetur id facere, de quare Hyginus Fab. 164. An consultant de Filiabus Cecropis? Adstat enim Actæo textâ de vimine cista, cui pedem hæc imponit. Neutrum ego dixerim, excepit DULODORUS. Apud Hyginum enim, non Palladem memini, sed Neptunum, Atticam terram irrigare constituentem, & à Mercurio prohibitum: Ad eò ut prior opinio absque dubio evanescat. Posterior nihilo firmior est. Textam de vimine cistam non video. Lapis est, quales columnis, aliisque ædificiorum partibus apponi solent: Et hic, si aliud nihil, assertum meum non modicè videtur fulcire. Ex Luciano, regessit ETASTES, recordor, Mercurium, cum Deas in judicium deduceret, cum Minerva seorsim collocutum esse: Quid si huc Gemma referenda sit? Si facias, respondit DULODORUS, per me licebit, quanquam quòd in via inter gradiendum id factum sit, in Gemma autem aperte subsistant, Lapisque pedi substratus ædificii cuiusdam index esse possit, ab opinione mea nondum censere decedendum. Commodè succurrit Inscriptio Gruteriana p. 50. n. 7.

### MERCURIO ET MINERVÆ DIS TUTELARIBUS. S.

Ex Lapide tetragono desumpta, cujus in summo, Mercurius & Minerva, ambo suis cum ornamentis memorantur stetisse, erecti singulari corpore, solo capite distincti, quod utique ad conjunctionem in Gemma egregie facit. Ut taceam quod in Propylæo templi Hazakienfis, quod Oppidum VIII millibus ab Ulpia Trajana absuit, eodem Grute-

Grutero teste, fterint. Non abs ratione hoc; Pausanias enim p. 557. Minervam & Mercurium θεὸς περὶ ἀγῶν live *Vestibulares* memorat; eorumque statuas, ait, in ipso Thebarum aditu fuisse, Mercurii quidem à Phidia, Minervæ autem à Scopā factam: πρώτα μὲν δὴ λίθῳ καὶ αὐτὴν ἐπὶ τὸν ὄψιν Ἀθηναίαν καὶ ἑμῆς ὀνομαζόμενοι Περσῆται. ποιῆσαι δὲ αὐτὸν Φειδίας, τὴν δὲ Ἀθηναίαν λεγέσθαι Σκόπας. Quæ verba non minus etiam ad Gemmam Theauri Palatini allegari possent. Nisi fallor, excepit ETASTES, Gemma hæc etiam ex Schedis Bellorii à Causæo in Museo Romano proposita est. Est, reposuit DULODORUS; Sed ille maluit ad Præfecturam Gymnasiorum respicere, quò sensu Herma-thenam ex Mercurio & Minerva compositam Cicero credidit, ad T. Pomponijum Atticum, L. 1. Ep. 3. *Quod ad me de Hermathena, inquit, scribis, mihi pergratum est, ornamentum Academia proprium mea, quod & Hermes commune omnium, & Minerva singulare est ejus Gymnasi, &c.* Non male hæc, insit ETASTES, & quidem ad conjunctionem quæ in Gemma visitur, optimè. Eundem in sensum, perrexit DULODORUS, imò & majorem ad conjunctionis lucem, est & testimonium Aristidis de Minerva p. 26. Tom. I. Ἀλλὰ μὲν, ἦγε πρὸς ἑμῇ κοινοῖα τῆς θεῆς, παντὶ δήλῃ. ὅστις ἑμῇ καλῇ λόγιοι καὶ ἀγοραῖον καὶ ἐμπλαῖον. Ἐναγνῆν δὲ καὶ ἀντὶ χορηγῶ καθήκειν. ὁ μὲν μὲν γὰρ καὶ ἀντικρὺς αὐτῇ ἐναγνῆν δὲ ἀποφαίνει, τὰ γὰρ ἀθλα κρῖναι δὲ αὐτῇ. Jam quanta illi cum Mercurio societas intercedat, nemini potest ignotum esse, qui Mercurium *Sermonis, Fori & Mercatura Præsidentem* vocet. Nam *Athletico* quidem ipsa instar Cboragi est, & ab Homero nominatim *ATHLETICA* vocatur, quòd de Certaminibus de suo judicat arbitrio. Hæc Aristidis, ut & superiora, rationem simul pandunt, cur Cecrops Mercurium in Templo Minervæ Poliadiæ dedicaverit, ejus rei en testem Pausaniam, in Atticis, p. 48. Κάται δὲ ἐν τῇ ναῷ τῆς Πολιάδης ἑμῆς ξύλῳ. Κέντρον δὲ εἶναι λέγομενον ἀνάθημα. Ercellus autem est in Poliadiæ delubro Mercurius ligneus. Fuisse ajunt Cecropis donum. Luculentos conjunctionis testes adducis, inquit ETASTES, luculentas & ejus rationes. Quid autem ad propositum sequar? Deos περὶ ἀγῶν, respondit DULODORUS, idque vel ideò, quòd etiam in allegato suprà lapide, singulari corpore conjuncti memorantur, imò quòd in Gemma Lapis, cui Minerva pedem imponit non vnum videatur vestibuli, à quibus denominantur, indicium. In Gemma 170. se sistant

## PHILOSOPHI In Academia ad Aram Minervæ dissertantes,



Mihi,



*Overat argentes Aquilo jam fexior alas,  
Indueratque rudi glacialia vincula terra.*

Rediit ad constitutum ETASTES, & solitâ salutatione præviâ, recusam ante biennium GORLÆ DACTYLIOTHECAM producens: Quid, inquit, DULODORE, de hac judicas? annon egregiè aucta? egregiè illustrata est? Laude suâ, respondit ILLE, opus hoc non caret; Esse tamen quædam, interdum etiam in vulgaribus, quæ certius lumen requirant, omnino est fatendum. Adeonè? subjicit ETASTES, & quænam illa fuerint? Indicabo, respondit DULODORUS, sed ordine eò, quò mihi in mentem venerint, & eâ omnino lege, ut veritatis amore, non intempestivâ prurigine Tibi videar obtemperasse. In Gemma 103. me quidem judice, exhibetur

## PHAETHON

*Stellas fixas incurfans.*



Errorem Liceti, excepti ETASTES, mihi videris recoquere. Is Solem hanc figuram statuit, deflectitque ad ampliatum ejus imperium, sicut alii quærun, qui per diem conspiciantur Stellæ? Sed his jamdudum responsum est, cum indignum sit, cogitari de Sole, ubi nulli radii, & contra tot Stellæ. Annon potius sit Bootes, cum Septentrione?

trione? ideo sanè ut rusticus videtur stare in plauistro, non in fabrefacto curru. Plaustrum, regessit DULODORUS, rem non conficit. Eidem enim insistentem etiam Solem videas, apud nostrum in annulo 77. Et quid? Annon indignum esset, Bootem laureatum procedere? Annon indignum Equorum quadrigis vehi, qui à bobus dictus est? Non Equis, sed bobus & quidem duobus, tantum, Bootes vehebatur, id quod ex Hygino discimus: Ut taceam, ipsos septem Triones Booti & plaustrum & boves esse. Qui fit igitur, ut in Gemma separatim fuerint expressi? Vides ETASTA, commentum de Boote fragili fundamento insistere. At certè, insit ILLE, nec Phaethon hic esse poterit, utpote cuius, Ovidio teste,

*Ora pater rapida fecit patientia flamma  
Imposuitque coma radios.*

Cum tamen heic radiorum loco Laurea sit. Quod ad radios attinet, reposuit DULODORUS, fateor dubium suo pondere non carere, nisi Licetus, aut ejus Sculptor, in exigua Gemma, radiorum loco Lauream subjecerit. Id ut omnino arbitrer, facit densa erectorum foliorum congeries, quæ in Laurea solita non est, exigua autem mutatione radios adumbraret. Si hoc Tibi cedam, inquit ETASTES, de Phaethonte tamen nondum persuades, non magis ac de Sole. Quid enim? annon & Phaethon currum ascendit, postquam Stellæ jam diffugissent? Quid igitur Stellæ currum in Gemma ambientes? Intuere Gemmam, respondit DULODORUS, & simul in mentem Tibi revoca tersissimum Ovidii de Phaethonte testimonium. Annon omnino hic cernitur,

*Mentis inops gelida formidine lora remisit?  
Quæ postquam summo sensere jacentia tergo,  
Exspatiantur Equi, nulloque inbibente per auras  
Ignota Regionis eunt, quæque impetus egit,  
Hæc sine lege ruunt, altoque sub æthere FIXIS  
INCURSANT STELLIS?*

Quid clarius? quid concinnius ad Gemmam dici potest? Sed ad alia transeamus! In Gemma 338. mihi videtur exhiberi

## H E C T O R,

Suum casum, vigorem, & juventutem lugens.



Novæ, inquit ETASTES, de Gemma proposita, hæc est opinio. Hectorem adhuc nemo agnovit, sed vel militem atroci bello superstitem, adeoque pauperem: Vel sanè militem

militem Sagittarium, nudum, & rupi accubantem, manus ambas, circa genu dextrum elevatum, complicatas habentem, vel admirantis gestu, vel miserantis, armaque sua, hoc est pharetram & arcum, arbore suspendentem. Quid ais, DULODORE? Verba hæc esse, respondit ILLE, non rationem, non originem inquiri. Hectorem hic exhiberi, sequentia Pausaniæ persuadent, in Phocicis : *ἐν ᾗ τοῖς κάτω τῆς γραφῆς κτ' τοῖς ὀρθοῖς ὁ δὲ θάμνου ἐκτορ μὲν καθέζομενός ἀμφοτέρᾳς ἔχει τὰς χεῖρας περὶ τὸ ἀριστερὸν γόνυ, ἀνιόντος ἡμῶν ἐμφαίνον.* Infima Tabula, post Thracem Thamyrim, HECTOREM habet SEDENTEM, & UTRAQUE MANU LÆVUM GENU PREMENTEM, tristi admodum facie, & lugubri habitu. Quid clarius ad Gemmant dici potest? Imò sunt, inquit ETASTES, quæ assensum morantur; Primi enim non genu sinistrum, sed dextrum in Gemma amplectitur sedens: deinde Hectori licet Clypeus conveniat, non tamen conveniunt Arcus & Pharetra ab arbore suspensi: Ut taceam barbam, quæ Hector & apud Seguinum, & in Musæo S. Genouevæ visitur ornatus. Quod barbam concernit, respondit DULODORUS, dubium evanescit, cum utique non barbatus tantum in allegatis, sed & imberbis in Tabula Iliacâ apud Celeb. Fabretum non semel occurrat, & juvenis Hectoris concinnius sine barba adumbretur. Quod de genu dextro moves, nec ipsum alicujus momenti est; Figuræ enim Gemmis incisæ, si in Gemma dextræ appareant, ex Gemma expressæ, sinistræ sunt, & vice versa: Adeo ut Sculptoris vitio partem dextram exceptam dicere liceat, quæ si ad historię fidem respicias, sinistra esse debuisset. Ut de Pharetra & arcu satisfaciam, omnino monendum, Hectorem hic pingi, non qualis contra Græcos præliatus est, sed qualis ab Achille occisus, in Inferno casum suum luxisse credebatur. Id non tantum ex Pausaniâ adstruxeris, qui in Tabula Polygnoti, quæ Ulyssis ad Inferos descensum adumbravit, eum talem fuisse memorat; Sed etiam ex Homero, qui cum Hectorem, ab Achille lethali vulnere prostratum, per animam & genua Victori supplicasse, ne se canibus dilacerandum objiceret, nec tamen obtinuisse, ideoque etiam Achilli dirum exitum imprecatum memorasset, subjicit:

ὃς ἄρα μιν εἰπόντα πλὴν θανάτου κάλυψε,  
 ψυχὴ δ' ἐκ μελών πλάμῃν αἰδὸς ἢ βεβήκει  
 ὃν πότμον γούωσα, λίπ' οὐδ' ἀδροίηται καὶ ἦβην.  
 Sic igitur ipsum locutum finis mortis cooperuit:  
 Anima autem è membris volans ad infernum ivit,  
 suum casum lugens, relinquens vigorem & juvenutem.

Ex his, inquit ETASTES, equidem de tristitia & juventute patet, de Pharetra autem & Arcu nondum patet: Et quid arbor, cui appensi sunt? Arborem, respondit DULODORUS, in inferno non miraberis, cum & Orpheum arboris trunco acclinem, lævaque Salicis frondes contrectantem, quas *Lucum Proserpina* Pausanias interpretatur, in eadem Tabula pinxerit Polygnotus. Arcum & pharetram ad Apollinem retulero, cujus auxilio Hectorem apud Homerum Juppiter commendat, quique eundem etiam in allegata Tabula Iliacâ sublevar, unde & Lycophroni πρόφης πλοῦς παλῆς, *Alumnus Ptoi patrû,* aut *Apollinis*, dicitur v. 264. seq. Incongruum scil. non videtur, si Hector, postquam occubuit, inane & Dei auxilium, inane & Clypei sui præsidium, etiam apud

Inferos deplorans, nobilissima hæc in Gemma credatur adumbratus. Succedit in Gemma Annuli 132.

## LUSUS CUPIDINUM.



Hæc modò, subjecit ETASTES, Laur. Pignorium in Symbolis Epist. sentire, Erotem & Anterotem Cupidines hos interpretatum, non ignoro, sed Gemmam accuratius contemplatus, quòd lineæ illæ rectæ majoris sculpturæ, in minore apud Gorsæum non sunt, & rotundus ille Orbis circulo oblongo adfigatur, potius ad concordem pacem respiciendum arbitrer, quàm ligata sunt Elementa, quorum Oceanus in ipsa Annuli pala expressus circumfluit omnia: Terra se librans pondere suo ei innatat: Suprà Aer ac superior Æther volantium specie ita exhibentur, ut manibus brachiisque innexis se mutuò retineant. Digna Philosopho sententia! exclamavit DULODORUS. Annon vides secundum hanc, mare non terram tantum, sed & ærem & ætherem ambire, Terramque absque Oceano globum constituere? Imò nec suò pondere se librare, utpote Oceano innixam? Quis autem adeò obtusæ mentis est, ut hæc statimere ausit? Nugæ, Nugæ sunt, quas Tu hic mihi venditas. Tutius sanè in Cupidinum lusu subsistit, sive Eros & Anteros hic adumbretur, sive Amor Cœlestis & Vulgaris. Amoris quidem, inquit ETASTES, Cœlestis & Vulgaris Plato, Erotos & Anterotos Pausanias meminerunt, id quod jam alibi docuisti, quàm ratione & Venus,

### Geminorum Mater amorum

Ovidio vocatur, in Fastis; sed nondum video, quàm ratione in Gemma credi possint expressi? Duplici arbitror, recessit DULODORUS, globum vel Terram interpretando, vel Pomum: Si Terram, omninò agnoverim amorem Cœlestem, plebejum à terrenis sordibus abstrahentem: Si Pomum, omninò lulum ei similem, qui apud Philostratum describitur, Icon. L.I. Ubi cum *Eponas* mala colligentes, & variis gestibus vel gradientes, vel volantes memorasset, inter alios quatuor formosissimos, ait, à cateris fecisse, eorumque duos, MALA sibi vicem mittere, alteros duos mutuis se sagittis pericere. Addit & luctam: *Alum* scil. a *versarium* superasse, IN EJUSQUE DORSUM VOLANTEM, cum in suffocationem abducere & *cruribus* necere. Hunc verò rectum assurgere, manumque, quàm angitur, dissolvere. Spectantes autem, quod præter luctantium morem appat, POMIS ipsum appetere. Si hæc ita se habeant, inquit ETASTES, similem Cupidinum, an lulum? an luctam? Tecum agnoscere non amplius dubitabo; nam & hic Cupido



Mihi, inquit ETASTES, simplicius duo Eruditi viderentur, sedentes in Cathedris & dissertantes, velut ad aram Lugdunensem, cuius mentionem fieri novimus ab Anti-  
quis, qui notabiliter hinc illustrantur. Asserto accedere vereor, respondit DULO-  
DORUS, idque ideo, quod ara Lugdunensis non Minervæ, sed Augusti fuit, uti no-  
tat Gangræus ad illud Juvenalis:

*Lugdunensem Rhetor dicturus ad aram.*

Mulcò aliter proposita. Minervæ hanc esse, ex ipso imposito ei Minervæ capite pa-  
tet. Minervæ autem aram in Academia Atheniensis fuisse, ex Pausania constat, p. 18.  
ἐν Ἀκαδημίᾳ ἐστὶ Μινυῶν τὴν βωμὴν, καὶ ἱερὸν ἕκαστον, καὶ τὸν οὐδὲν Ἀθηναίων. In academia Mus-  
arum sunt, & Mercurii ARÆ, & interius MINERVÆ. Quid clarius dici potest? Fateor, ex-  
cepit ETASTES, & gaudeo, quod rei basin audierim. Mihi quidem mea opinio  
etiam dubia fuit, sed alio ex capite. Ad Aram Lugdunensem Rhetores certasse, ex al-  
legato Juvenalis versu intelligimus: Rhetores autem stantes arbitrabar munere fun-  
ctos. Hæc ratio, subiecit DULODORUS, si valeat, de quo tamen vereor, ne dubitari  
possit: si inquam valeat, non tantum Rhetoribus Gemmam abjudicat, sed etiam Aca-  
demicis eam addicit. Nosti ETASTA, Peripatheticos dictos, quod ambulando di-  
sputarent, id quod Cicero L. I. Academicarum questionum docet. Peripatheticos  
igitur hæc in Gemma vel ideo negabis, quod non ambulant, sed sedent. Nosti Aca-  
demicos ab Academia dictos, eodem Cicerone docente: Et quò insigni locus is de-  
notaretur clarius, quàm Aræ Minervæ, in Academia secundum Pausaniam reposita? In  
Academia inquam, cuius Cicerone teste, ut modò dictum est, Minerva peculiare Nu-  
men fuit, & in qua Academici conveniebant, & disserendo se exercebant? Minervæ,  
sanè apertè satis non Lugdunum, sed Athenas designat, & Philosophi sedentes simul  
adumbrant etiam Philosophorum, de quo Socrates apud Platonem: *Philosophi*, inquit,  
*otio tranquillo confabulantur.* In Gemma 3. adumbratur

## FORTUNA AEGIRENSIUM

cum assistente Cupidine,



Fortunam video, inquit ETASTES, eique ablanditur Cupido. Rectè vides, respon-  
dit DULODORUS, sed adde rationem. Qui possem? regessit ETASTES, nullò  
Authorum eam suggerente? Imò Pausanias, perrexit DULODORUS, eam adeò  
clare deducit, ut nihil dubii remaneat. Ita ille in Achaicis, p. 451. Οὐδα καὶ Δικηνα ἐν

Αἰγίρα θησαυρὸν, ἀγαλμα γὰρ ἐν τῷ οἰκήματι τύχης, τὸ κλέας φέρουσα τὴν ἀμαλθέαν.  
 Περὶ ἣ ἀνὴρ ἔπος πρὸς ἔχον ἔειπεν. ἰθὺς ἢ σημαίνει, ὅτι ἀνδράποιοι καὶ τὰ ἐς ἔρωτα πύχ-  
 ραλλον ἢ ὑπὸ καλλῶς παρορῶνται. *Adicula etiam quadam Ægira est, in qua Fortuna signum  
 sum conspicitur Amalthea cornu gestans, cui assistit volucer Cupido. Significat nimirum  
 hac amoris & fortuna conjunctio, plus ferè in amore homines ope fortuna, quàm pulchritu-  
 dine proficere.* Quid concinnius ad Gemmam dici potest? Fateor, inquit ETAS-  
 TES, video enim Fortunæ Cornucopiæ: Video Cupidinem cum alis: Video utrum-  
 que conjunctum, planè qualiter Pausaniæ memorantur. Imò & illud notari mere-  
 tur, quod Statuas has Ægira fuisse Laudatissimus Author testatur. Vellem autem  
 scire, quis Ægira situs, quod Etymon fuerit? Non abs re mihi facere videris, respon-  
 dit DULODORUS, simul enim nosces, cur Cornu Amaltheæ Fortunæ simulacrum hoc  
 præferat. Amalthea capra fuit, quæ Jovem nutrit, uti aliunde patet: Et à Capris de-  
 nominatam Ægiram, ejusdem Pausaniæ assertum est. Verba Romano idiomate ad-  
 scribam, ne multitudo sermonis Græci Tibi tædium pariat. *Nihil in maritima ora bi-  
 bent Ægira memorat dignum. A navali superior Urbs stadia abest XII. appellata ab Ho-  
 mero est Hyperefia. Recentius enim nomen ea Urbs, quam Jones ante Coloniam deduxerat,  
 ob hujusmodi causam accepit. Cum Sicyonii, comparato exercitu agrum invasarè essent,  
 intelligentesque Hyperesenses, nullo se pacto pares illi numero & viribus futuros, CAPRAS  
 omnes, quæ intra fines erant, in unum cogerunt, adligatasque ad cornua facies intempesta  
 nocte accendere. Hostes, ignes eos esse ad auxiliariis Ægiratarum suspicatos, retrò agmen  
 egere; à CAPRIS itaque (Ἀγίρας Græci vocant) mutato veteri nomine, Urbs Ægira est ap-  
 pellata. Hæc Pausanias. In Gemmis 299-313-314. 320. nobis exhibetur*

## SILENUS



Non Silenum, inquit ETASTES, sed in primo Socratem & Alcibiadem: in secundo & tertio Socratem, vel saltantem, vel cum puero ludentem: in quarto denique Xenocra- tem agnoverim, asino vestum. Non Tuò id facis judiciò, respondit DULODORUS, sed Celeberrimi Chisletii repetis sententiam, qui Socraticam effigiem variis cum insi- gnibus prodidit. Sed uti Chisletium in his sibi nimis indulisse arbitror, ita vellem Chisletianas Gemmas uberiorè eruditionis Nectare perfundi. Hæc ut ut se habeant, insit ETASTES, talia sanè per me sint; An autem Socrati & Xenocrati has Gemmas minus rectè addixerit Chisletius, non video. Alcibiadem Socratis disciplinà usum, ex

Historia

Historia constat: Et Xenocratem non tantum adscriptum nomen arguit, sed & Platonis iudicium, qui eum ob tarditatem ingenii, *Asinum* appellavit. Nihil agis, inquit DULODORUS; In prima enim Gemma Silenum & Bacchum corona hederacea, in reliquis Thyrsus arguunt, & notissimum Sileni simulacrum.

Silenum, reposuit ETASTES, in Gemma prima & tertia fortassis fateri possum; Constat enim Bacchi Nutricium fuisse, indeque cum eo & jungi & ludere. Quid autem ad secundam dicam, non video. Quid? An Silenus legitur saltasse? annon potius de Socrate opinio valeat, quod saltationem is probaverit? & per Canem, cuius ideò caput affictum credi potest, apud Platonem iuraverit? Speciosè hæc dicuntur, perrexit DULODORUS, an vere? id sanè nescio. Licet enim saltationem probaverit Socrates, non tamen legitur saltasse, non legitur thyrsum prætulisse: At utrumque de Silente indubium est. De thyrso quid opus est probare? De saltatione audiamus Nonnum in Dionysiis L.XIX. v. 261. & seqq. Ubi cum Amorem hederâ viteâ comam Bacchi coronâsse memorâsse, addit:

Τοῦτο σοφῇ παλάμῃ κερσεῖς Σειληνὸς ὑφαίνων,  
Δεξιτερὴν μὲν ἔπαυσε πολυσκάρφῃ δὲ πεδίλῃ  
Ἐκ χθονὸς ἠώρητο, καὶ ἡέρι πέμπεν ὀπωπᾶς.  
Πῇ μὲν ἐπ' ἀλλήλοισιν ὁμόζυγα ταρσά συνάπτων  
Πῇ δὲ διαζεύχας ἑτεραλκεί παλλετο τέχνη,  
Ἄλλοτε πουλυέλικτος ὑπὲρ δαπέδοιο χορεύων  
Ὅρθος ἐπὶ στέρνοις ἐλικώδεϊ σείετο παλμῷ.  
Δεξιτερῷ δ' ἀγναμπτος ἐπεστιρίζετο θαρσῶ.  
Δάκτυλον ἄκρον ἔχων ἑτέρου ποδὸς, ἢ γόνυ κάμψας  
Συμφερταῖς παλάμῃσιν, ἢ ἑκταδίν. πτύχα μηρῶν  
Σειληνὸς βαρύγυνος ἔχων ποδὸς ὄρθιον ὀρμήν  
Καὶ πόδα λαὸν αἶρειν ἀπὸ πλευροῖο καὶ ὤμου  
Κουφίζων ἐλκιδὸν ὀπισθοτόνῃ δ' ὑπὸ τέχνη  
Καμπύλον ἠώρησεν ἐπ' αὐχένι ταρσὸν ἐλίξας.  
Καὶ βαλὴν στροφάλιγγι παλιννόστοιο χορεῖς,  
Ἵπτιος αὐτοέλικτος ἐκάμπτετο κυκλάδι τεχνῇ  
Πεπταμένην ἐπικυρτον ἐς ἡέρα γαστέρα φαίνων,  
Τὴν αὐτὴν στεφανηδὸν ἀτέρμονα νύσσαν ἀμείβων.  
Καὶ κεφαλῇ πεφόρητο παρήγορος, οἷα περ αἰ  
Ἀπτομένη δαπέδοιο, καὶ οὐ φαύουσα κοίνης.  
Καὶ ποδὶ λαχνηέντι πέδον Σειληνὸς ἐλίσσων,  
Ἄστατος ἔνθα καὶ ἔνθα ποδῶν βακχεύετο παλμῷ.


Hoc prudenti manu cornutus Silenus texent,  
 Dextram quidem cessare fecit, multum vero saltante pede  
 Ex terra tollebat, & in aëra misit oculos.  
 Interdum quidem ad invicem conjunctas plantas connectens  
 Interdum vero dijungens, alterna vibrabatur arte,  
 Interdum multum volubilis super solo saltans,  
 Rectus in pectora volubili vibrabatur vibratione,  
 Dextrâ vero non flexilis, firmus stabat in planta,  
 Digitum summum habens alterius pedis, aut genua flectens  
 Collatis manibus, aut extensam plicaturam femorum  
 Silenis genibus gravis habens pedis rectum impetum.  
 Et pedem sinistrum sustulit à latere & humero,  
 Elevans volutim, retrotensa vero ab arte  
 Incurvum sustulit super Cervicem plantam volvens  
 Et veloci turbiæ retrograde choreæ,  
 Supinus per se volubili flectebatur circulari arte.  
 Volantem incurvum in aëra ventrem ostendens  
 Eandem coronatam infinitam orbitam transiens.  
 Et caput ferebatur sublime, tanquam semper  
 Volans super solo, & non tangens pulverem  
 Et pede hirsuto solum Silenus rotans,  
 Instabilis hinc & hinc pedum bacchabatur vibratione.

Hæc de Sileno Nonnus, & quam ad Gemmam appositè? Fateor, excepit ETASTES, & si de afflicto Cane eadem *ἀξιόβητα* doceas, jam non pœnitebit opinionem de Socrate relinquere, Tuamque de Sileno saltante amplecti. Canem, reposuit DULODORUS, licet non Sileno, Baccho tamen à Pane datum, ejusque fidum comitem fuisse, ex eodem Nonno discimus. Fortassis occasione inde sumptâ, etiam fides Sileni in Bacchum hoc symbolo adumbrabitur. Bacchus certè tanti memoratur Canis sui fidem fecisse, ut etiam Sideribus eum illaturus memoretur. Verba adducerem, nisi multitudine tardiosa forent, præsertim cum superioribus de saltatione, aures Tuas jam nimis oneraverim. De Xenocrate audire placet, subjecit ETASTES, quem & ipsum pro Sileno habendum, Te meminî statuere, cum tamen & nomen & ingenium Xenocratem evincant. Neutrum videtur, regessit DULODORUS. Si enim Platonis judicium de Xenocratis tarditate attendendum sit, non Xenocratem Asino vehi, sed ipsum Xenocratem Asinum esse, dicendum erit. Et quid? Annon & hic Thyrsus Silenum evincit? Thyrsus, qui Xenocrati nullò, Sileno autem omni modo convenit. Silenum autem Asino vehi etiam pueris innotuit. Adscriptum Xenocratis nomen opinioni non refragatur. Quæ enim necessitas nos cogit, ut nomen tantum ejus arbitremur, qui in Gemma coelatus visitur? Annon potius erit ejus, qui Gemmam coelavit? idque secundum morem Artificibus præcis familiarem, uti videre est exemplis Dioscoridis & Apollonidæ apud Celeb. Spônium. De his ex Plinio discimus, perrexit ETASTES, quis autem de Xenocrate? Idem Plinius, inquit DULODORUS; En verba:

verba: *Xenocrates Tisceratis discipulus, aut ut alii Eutycratis, dicit utrosque copiam signorum, & de sua arte composuit volumina.* Statuarius hic fuit, excepit ETASTES, à quibus Cœlatores Gemmarum utique totò cœlò differebant. Imò Artifices ejusmodi, respondit DULODORUS, interdum in diversis se exercuisse, exemplo Myconis constat, qui licet Pictor & Statuarius fuisset, Plinio memoretur, tamen & Gemmam cœlasse, exemplo ejus noscitur, quæ apud Sponium d.l. prostat. Xenocrates sanè & ipse, non Statuarius tantum Plinio memoratur, sed & de Pictura scripsisse, L. 35. c. 10. Adeò ut non malè de eò Rev. Harduinus in Indice Authorum; *Xenocrates, qui de Torentice scripsit, insignis fuit pingendi CœLANDIQUE artifex, Tisceratis discipulus. Tiscerates Lyppi, qui Alexandri M. temporibus vixit; Unde Xenocratem atate Ptol. Philadelphi vixisse consuevit.* In Annulo 18. & Gemma 23. exhibentur

## APES FLORILEGÆ

Parentum more rura colentes.



In Gemma priore, excepit ETASTES, Apis fortassis Thymo insidet, ut Horatiana. De Thymo nollem adderes, inquit DULODORUS, Dioscorides enim Thymum ab omnibus ait cognosci. Si autem eum agnovisses, agnosceres procul dubio florem, hunc à Thymo totò cœlò differre. Collatio, subjicit ETASTES rem in aprico ponet. Eam facillimè instituo, regessit DULODORUS. Flos hic uno caule ex terra enatus, foliisque utrinque longioribus vîsitur ornatus, eòdem ferè modò, quò apud nos Tulipæ solent: At *Thymus*, Dioscoride docente, *surculosus frutex fuit, exilibus foliis, multis & angustis circumdatus capitulis, in cacumine flore purpurascens refertis.* Quid eorum in flore proposito? Nonne vel hinc patet, Te memoria eorum decipi, quæ passim apud Authores de Thymo Apibus depasto leguntur? Noveris autem non Thymo soli, sed aliis quoque floribus Apes insidere. Hoc sanè sensu Ovidius *Florilegas* dixit, verbis mox allegandis. At mihi, inquit ETASTES, talis flos, qualis in Gemma affictus est, non succurrit. Neque mihi, respondit DULODORUS, nisi Pæoniæ censeas, Sculptoris vitio minus affabrè exceptam; Hæc enim inter omnes, quos novi, proposito proximè videtur accedere. Sed res ex contemplatione prototypi decidi debet, nec nostrum est, ulterius ei inlatere. Quid autem dicis ad Gemmam secundam? quæsitit ETASTES, in qua jocosam arationem, aratore Ape, & similiter

duabus aratrum ducentibus, & iugo junctis, video. Jocosæ aratio, respondit DULODORUS, hæc non est. Id facile perspicies, si causam, si originem inquiras. Utramque exhibet Ovidius Met. 15. v. 365. Ubi cum docuisset, quomodo Apes à Bobus ori-  
antur, appositè ad Gemmam subjecit

*De putri viscere passim*

FLORILEGAE nascuntur APES, quæ MORE PARENTUM

RURA COLUNT, operique favent, in spemque laborant.

Licet enim hæc verba de labore Apum naturali, colligendo scilicet ex floribus melle, intelligenda sunt, nemo tamen non videt, etiam ad eum quadrare, qui in Gemmis, cum procul dubio in finem, expressus est, ut Apum à Bobus origo, & æmula originis sollicitia simul connotetur. In Gemma 103. & Annulo 73. adumbratur

## SYMBOLUM AUGUSTI

ΣΤΕΥΔΕ Βραδέως - Festina lentè.



Ad primam Gemmam, exceperit ETASTES, assurgere possum placito; Ex eo enim, quod in Durmiz Gentis Numismate hunc typum inveniri notum est, non obscurè simul & de symbolo Augusti patebit, cum Numisma id etiam Patino ita explicetur: Nec abs ratione; Papilio enim festinationis, & Cancer, sive Pagurus, lentitudinis symbolum, si conjungantur, quomodo aliter explicabuntur? Rem probè tenes, inquit DULODORUS. Quid autem ad Gemmam secundam dicis? Etiam hic de Augusti symbolo Te video sentire, subjecit ETASTES, & id quidem cum Chiffetio facis. At mihi Augusti symbolum hic videri potuisse, mirum videtur, cum potius Vespæ sit, fulmini advocans. Mihi, recessit DULODORUS, mirum videtur, Te Vespam fulmini advolantem hic videre posse, cum tamen Vespæ hujus nullæ sint alæ. In his sanè tota controversia decisio versatur. Si adessent, Tecum sentirem: cum absint, fulmen celeritatis, Vespam autem ἀπὸ τοῦ tarditatis symbolum arbitrarer, adeoque conjunctionem ad Augusti ΣΤΕΥΔΕ Βραδέως, referendum, omninò censerem: Quanquam, quod notandum, hæc opinio Chiffetii non fuerit; Ubi enim ille de symbolo Augusti ad hanc Gemmam? Scarabæum arbitratur, fulmini idèò impositum, quod Soli & Lunæ is sacer esset, & quod, ut apud Plinium est, ad avertendas tempestates Smaragdus insculperetur. Sequuntur in Annulis 48. & 5.

OLORES

OLORES  
VENERIS.



Non Olores, inquit ETASTES, sed Anseres in his agnosco: Quanquam, ut verum fatear, vel ideò res mihi dubia sit, quòd Veneri Anseres dicatos hactenus invenire non potuerim. Licet Authoritas desit, respondit DULODORUS, tamen non deesset ratio, si modò anseres hos esse, figura suaderet. Quid enim? an nescis Plinium scribere, *Anseribus inesse famam amoris?* id quod confirmat exemplis, ab Anseribus amatorum, *Oleni* scil. pueri, quem Athenæus *Amphilochem* vocat, & *Glaucæ Citharæ* canentis? ut taceam *Lacydem Philosophum*, quem Anser adeò amasse eidem traditur, ut ei perpetuò adhæserit, nusquam ab eo non in publico, non in balneis, non noctu, non interdum discesserit. Exempli ad rem faciunt, exceptit EPASTES, & mihi in mentem venit & Homeri locus, ubi Procos Penelopes sub Anseribus intelligit. Id ob voracitatem, respondit DULODORUS: Ad Venerem autem propius fortè, quòd Anser ei Clypeo insculptus erat, quem Vulcanus in Veneris gratiam pro *Ænea* fabricavit, id quod ex Virgilio patet: propius, quòd Nemelin, cum à Jove Cygno comprimeretur, in Anserem mutatam, Cœlius Rhodiginus observat: Imò, quòd Anseres Priapo sacros, ex Petronio notum sit, ubi *Priapi delicia* vocantur, & omnibus *Matronæ acceptissimi* feruntur. Quæ rei causa? quæsitit ETASTES. Procul dubio, respondit DULODORUS, quòd testes Anserum comesti ad libidinem & procreandam sobolem plurimum conferant, id quod Physicorum calculò comprobatum est. Hæc si ita sint, subjecit ETASTES, quid prohibet Anseres hic Veneri sacros statuere? Si Anseres essent, respondit DULODORUS, in Curra non Venerem, sed Junonem intelligerem, aëris præsidem, cui Anser ideo sacer dicitur, quòd facillimè aëris motum sentiat, ut Servius notavit. Ad aërem sanè etiam alæ flagello affixæ referri possent. Junonem, exceptit ETASTES, Infantes remouent: Quid autem Anseres removeat, fateor me non videre, cum utique nec Cygnos hos esse, breuitas colli arguat, quæ in editionis recusæ bigis, utique ad oculum patet. Subrisit DULODORUS, & egregiè opinioni velificaris, inquit. Non ex editione recusà, sed ex ipsa Gortæi talia censenda sunt. Hanc si conferas, apertum erit, in recusis Sculptorem, ut opinionem de Anseribus fulciret, colla brevissima delineasse, cum revera apud Gortæum longiora sint, quàm ut Anserum credi possint. Adde quòd nec rostrum, nec pedes in Gortæanis, Anseribus quadrent, sed omninò

omnino tales sint, quales in Cygnis Suevi nostri, Cygnorum sanè feracissimi, quotidie contemplamur. Cygnos, regessit ETASTES, Veneri sacros, imò & ab ejus curru religatos, novi nihil est. Horatius, Ovidius, aliique rem clarè, uti jam suprà vidimus: Quibus accedit & Statius in Epithalamio:

*Amyclaos ad frena citavit olores.*

Sed mihi de Venere dubium movent Infantes Cygnis inequitantes, qui Cupidines esse non possunt, utpote alis destituti. Ain Tu? reposuit DULODORUS. Ergo & illum Cupidinem negas, qui in Gemma Gorlæi 62. coram Vulcano alas fabricante Veneri adstat? Non aulim, respondit ETASTES; Hunc enim Cupidinem esse, adjuncta Venus demonstrat. Vides igitur, subjecit DULODORUS, alas Cupidini necessariò non affingi, id quod latius ex Athenæo alibi demonstratum dedi. In Gemma secunda id eò tolerabilius est, quò apertius Cupidinum alas flagello alligasse Venus cernitur, sive nondum eas aptaverint Cupidines, à Vulcano factas; sive eas in Matris gratiam deposuerint, ut apud Virgilium; sive denique Venus eas filiis ademerit, qualiter & arcum & pharetram in Gemma Liceti. Quicquid sit, Cupidines *Veneris aurigas* creditos ex eodem Statio patet, apud quem Amyclaos Olores

*Jungit Amor, lætæque vebens per sidera matrem  
Gemmato temione sedet.*

Indeque est quod Horatio L. IV. od. I.

*Amor purpureis ales Oloribus.*

Canitur: Imò quod *Cygnis descendere* Ovidio idem est, quod *rebus amatoriis finem imponere*, id quod Eruditi ad d. Poëta locum jam dudum notarunt. In Annulo 169. exhibetur

## CARACALLA cum LEONE.



Caracallam, inquit ETASTES, quid probare possit, non video. Inscriptio Gemmæ nulla est. Habitus cernitur militaris potius, quàm Imperatorius. Et si ex facie judicium feras, ea minutor est, quàm ut certi quid inde elicere possis. Quidni potius Martem hic agnoscam, cujus fortitudinem Leo adumbret? Leo, respondit DULODORUS, licet fortitudinis symbolum credi possit, fortitudo tamen ut in Marte probetur,



betur, necesse non est. Mihi ut Caracallam hic statuam, non facies, non inscriptio, sed historia suavit, quā Caracalla Leonem circumduxisse, familiariterque cum eo vississe memoratur; neque enim de aliō hoc dixeris quocunque. Audiamus Dionem: *Δὲ οὐ καὶ Ἀλφ. Σύρας πινὸς ἔχων, καὶ οὐκ ἐπὶ τῷ λαῷ, ἀλλ' ἐν αὐτοῦ ἀντιμαζῶ, καὶ ὁμογενοῦσιν, διὰ τοῦτον αὐτὸν ποιοῦντο, Φερντίου, ὅτι καὶ ἐκείνου αὐτὸν ἐχόντα καὶ ἐπὶ τῷ ἰδίῳ αὐτοῦ περὶ πατρὶος.* Adhuc quum per aliquam portam exiret, nullam rationem habuit Leonis; quē acinacem nominabat, quemque in suam mensam recipiebat & lectum, quum ei ipsum vinitisset excurrentem, ejusque vestem fregisset. Ex his, subjecit ETASTES, non tantum Caracallam cum Leone versatum, sed & Leonis simul nomen discimus. Id ejus fuit, regessit DULODORUS, quem inter ceteros vel maxime dilexit, quā ratione si eum in Gemma sculptum arbitreris, facile assensero. Mitis enim Leonis hujus coram Caracalla habitus, singularem quandam familiaritatem non obscure lubinnuit. Quanquam, quod omnino notandum, etiam alios Leones Caracalla circa se habuerit; Ita enim persequitur Dio: *Ἐπεὶ δὲ τὸ πρὶν καὶ ἄλλας λέοντας πολεῖν, καὶ αὐτὸς πινὰς καὶ ἀνδρῶν ὄντων, αὐτὸν δὲ καὶ ὁμοῖα πολεῖν καὶ φιλεῖν.* Alebat Antonius complures Leones, seculumque nonnullis habebat semper; Hunc verò publice sepe deosculabatur. Fateor, inquit ETASTES, ad Gemmam propositam res apprime quadrat. Sed miror Caracallam, hic non habitu Imperatoris depingi. Id nihil mirum, respondit DULODORUS, Martem dilexit, indeque eodem plane modo, quō in Gemma visus, etiam visitur in Nummis. Aspice sequentia:



Utrunque, subjecit ETASTES, Mars est. Imò, excepit DULODORUS, potius Antonius, id enim colligas non tantum ex chlamyde, quā in primo visitur, in posteriore autem deest; sed etiam, & quidem tantum non indubie, ex inscriptione, quā utique Marti nullo modo quadrat. Illustrissimum Mediobarbū, inquit ETASTES, hæc Numismata memini ad Memoriam Victoriæ Particæ, & Celsiphontis capite retulisse. Perperam id facit, respondit DULODORUS, omnino enim pertinent ad Securitatem Imperatoris, quum Caracalla in militari robore posuit. Id arguit Nummus eidem Mediobarbo ex Ocone repetitus, & sub Caracalla in ipso Principio positus, in quo figura militaris stans dextra clypeum; sinistra hastam tenens, SECVRI T. PERPETVA inscribitur, adeo ut hoc Nummō confirmetur, quod scripsisse apud Dionem legitur: *οὐ γὰρ τὸ πρὶν καὶ ὁπλῶν καὶ ἐξοπλιστὰς ἔχων, ἀλλ' ἐπὶ τῷ λογοπαίματι αὐτοῦ φορεῖται.* Ideo in armis fuit, & habet apud me pulchres, ut possim rumpere, qui de me perfer-

perferuntur, contemnere. Si hæc ita sint, exceptit ETASTES, in Gemma non militari robori tantum, sed & Leonum consortio videbitur confidere. Non abs ratione id opinaris, perrexit DULODORUS: Quanquam Leones in Numismatibus expressi, quos & ipsos Tibi hic monstrare placet,



Non tam ad Securitatem Caracallæ, quam ad eum pertineant, qui Caracallæ, contra Parthos præliaturo, in auxilium properavit. Audiamus Dionem; *Αντωνίνος ὡς καὶ πρὶν αὐτοῦ, ὡς μὲν ἐπὶ ἑαυτοῦ, κενερίσκει, ἐστίν, οὕτως. καὶ μάστιγι ἐν λίαντις ἐξαιτίας ἐξ ὧν κατὰ κράτος, συνιστάσθαι αὐτοῦ. ὡς αὐτὸς ἐπίστευεν. Antoninus quasi omnino superior fuisset, quos ne videras quidem, se dicisse gloriabatur, cum verò quòd Leo, qui im-  
proviso de monte descenderat, pro eo pugnasset nam id in literis scripsit. Leonem cum fulmine radiatum, inquit ETASTES, ego potius ad Acinacem retulero, quòd scilicet ut Aquila Jovis cælestis, ita hic, utpote Soli facer, ideoque radiatus, Jovis Romani armiger foret. Opinio ingeniosa est, respondit DULODORUS, sed præferri meretur Trib-  
stani sententia, qui ad memoratum modo factum respicit, ei enim suffragantur Trib-  
P. XIX. & XX. quæ in annum V. C. 966. & sequentem incidunt, quorum priore bellum Particum Antoninus patravit. Satis clarè rem demonstras, subjecit ETASTES, mi-  
hi autem mirari subit, unde Caracallæ tanta cum Leonibus familiaritas? Rationem,  
regessit DULODORUS, idem Tristanus indicat: hæreditariam scilicet ei à patre Severo  
fuisse. Severus Maurus erat: Mauris autem Leones comites, memorat Elianus, L. III. c. 7.  
*Μαυροῦ τοῦ δ' ἀνδρὶ ὁ λίων καὶ οὐδὲν κοινόν, καὶ πρὶν τῆς αὐτοῦ τῆς πόλεως ἔδωκε. Duo adhuc  
mihi quærere libet, exceptit ETASTES, primò unde Caracalla Leoni suo nomen A-  
cinaces imposuerit, cum tamen Acinaces Gladii genus fuerit? Deinde, cum & alii  
Leonibus familiares fuerint, quâ necessitate hic Caracallam statuamus? Quod ad  
primam quæstionem attinet, reposuit DULODORUS, fateor me nihil certi habere.  
Si tamen conjecturis locus, poterit Caracalla ad usum respexisse, indicatur scilicet  
Leonis familiaritatem sibi tantam securitatem præstituram, quantam aliis gladius so-  
leat, sive Acinaces, qui non tantum apud Persas hoc nomine inclauerat, sed & in  
Thracia loch Martis colebatur: Poterit etiam ad Leonem Ensiferum in Gemma  
M. POMPEII respexisse, de quo Plutarchus in ejus Vita, qualisque etiam in Nummis  
Antonii apud Cel. Patinum in Familiis vernitur. Ad secundam quæstionem respon-  
deo, occurrere quidem in historiis varios Leonibus familiares, ad Gemmam autem  
adeo**

adeo non quadrare, ut quadrat Caracalla. Habitu militari hic visitur, adeoque excludit Veneticum illum, de quo Silius:

*Harcale non pavidus facas mulcere Leones.*

Excludit Henricum ferreum, Comitem Holsatiz, qui seminudus baltheum & gladium gestans, in Anglia sub Eduardo III. emissum in se, Procerum invidia, Leonem incolumis in caveam reduxisse, Alb. Crantzio memoratur. Ita nec Battum adduxeris, quem cum antea murus esset, Leone viso sanatum, Pausanias author est. Nec Hannonem, quem Leones primum cicurasse, fama retulit; Illum enim metus, Hunc & armatura Romana arcet. Auguriis, perrexit ETASTES, Veteres plurimum tribuere. Quid si tale quid & hic concurret? Leo, respondit DULODORUS, Sandrocto Regni auspiciu dedit, dormientem lambens, linguaque sudorem detergens: quid autem hoc ad Gemmam? Ita & Aldrovandus Leonis occursum bonum homini augurium, Veteribus asserit visum, Licet Alexander ab Alexandro Leonis aspectum famosum & inglorium pronunciaverit, eo quod itinera infesta sit creditus facere, hostiumque pugnam sepe portenderit: Quid autem hoc ad rem? Nonne tutius in Caracalla subsistimus, convenientibus in hoc, & habitu & historia? Sequitur in Gemma 37.

# A U R A

Phidola dejecto  
Cursum in Olympicis perficiens.



Auram, excepit ETASTES, memini Te in Thesauro Brandenburgico protulisse. Sed mihi simplicius Equum contumacem, & dejecto Victore aufugientem, placet statuere; Quis enim rem ad Ludos Olympicos restringeret, nullo omnino eorum indicio rem determinante? Ad Ludos Olympicos, respondit DULODORUS, nuditas Equitis, sub Equo jacentis, nos respicere jubet; Pausanias enim Author est, postquam Callipatira virili ornatu ad Olympicos Ludos penetrasset, lege sancitum fuisse, ut nudati adessent ad Ludicrum, ipsi etiam Magistri. Et quis nescit, Equestres decursus Equitibus passim nudis, in Marmoribus prostare? In Gemmis 618. 593. & 563. exhibetur

# HORTUS ADONIDIS.



Ergo & hic, inquit ETASTES, à vulgari sententiâ discedis? Discedo, respondit DULODORUS. Quid enim suggerit præter verba? In prima Gemma vas cum flore agnoscit, vel quaecumque, vel ut denotet Ludos. In secunda Floram statuit nudam, ut solet, colligentem flores in vas, ad eos usurpâri solitum. In tertia Matronam floribus, quibus vas repletum adstat pedibus, & avibus deditam. At, subjecit ETASTES, Ludos per vasa adumbrari insolitum non est: Floram nudam esse, & flores colligere, fabulæ convenit: tandemque & Matronam floribus & avibus operam dare, nec ipsum utriusque ratione caret: ut taceam Annulum Gortai, cum quo hæc Gemma admodum convenit. Annulus is, respondit DULODORUS, cum proposita Gemma nihil commune habet. Spes in eo, & ex herba aut flore, & ex sublata Stolæ lacinia patet; In vase autem spica cernitur, spei scilicet implementum. Quid autem hoc ad propositam Gemmam, in qua nullum omnino spei indicium? nullum nec spicæ vestigium? Quod de vase Ludorum insigni memoras, id admitterem, si palmis Vasculum hoc ornatum esset. Licet enim non Urnæ tantum, sed & Amphoræ Ludorum insignia esse solerent, absque palmis tamen non solebat, id quod videre est ex Morellianis, Epistola prima Per-Illust. SPANHEMII, ubi plura de hoc more. Præmia, scilicet erant, sed præmia Victoriæ, quæ Palmis adumbrabatur. Ita & Floram agnoscerem, si florem in vasculo conspicerem, sed pace Tuâ dixerim, nullibi flos apparet; sed folia recens enata. An hæc, inquit ETASTES, Adonidis hortum demonstrant? Omnino, regressit DULODORUS, ita enim Plato in Phædro. Ὁ οὖν ἔχων γὰρ τοὺς ἀνθρώπους κηδοῖται καὶ ἔγκρατα βάλειν χεῖρας, πότρε περὶ αὐτῶν ἔχεις τίς Ἀδώνιδος κέρας εἶναι χεῖρας. ἡμεῖς οὖν καλῶς ἐκείνους ἀπὸ τοῦ γινώσκοντος: ἢ πάντα μὴ δὴ παιδίας τοῦ καὶ ἑστῆς χεῖρας δεινῶς αὐτῶν, ἀπὸ καὶ ποιεῖν. Num Agricola, qui sapiat, semina, quæ curæ haberes, quæque cuperet aliquando fructum adferre, astutu tempore, summò studio, in Adonidis hortos mittet, gaudebitque spectare eos intra dies octo jam pulchros effrictos? An ea quidem per lulum ac festi gratia faciet, si quando tamen fecerit? Hortorum Adonidis quidem mentio fit, perrexerit ETASTES: Foliorum non fit. At intelliguntur, inquit DULODORUS; Quid enim intra octo dies ex semine nasci poterit? quare re horri tantillo temporis pulchri poterunt fieri? si non foliis, & quidem tribus ut plurimum illis, quæ primò progeminare solent, quæque in vasculis Gemmarum cernuntur? An in vasculo



mus, intereamque brevi, tantam nostris curam habeat, non aliter quam MULIERES, quæ ADONIDIS HORTOS, ad dies pauculos vernantes, in TESTULIS quibudam nutriunt, foventq, avium brevi duraturæ, in carne tenera, & solidam viæ radicem non recipientes supponunt, & mox ad quamvis occasionem interitura. Hæc ut ut sint, non tamen Mulieres tantum, sed etiam Viros Adonidis hortos plantasse, Diogenianus Cent. I. Prov. XIV, videtur innuere. Επειδὴ δὲ ἄδωνις, ἐρώμενος ὦν, ὡς μύθος, τῆς Ἀφροδίτης, καὶ ἡβῆς πλεῖστα, οἱ ταύτῃ ἀγαθούτης, κίππος οἷς ἀγγυὰ πῶτα φυλάσσει, ἢ φυλάσσει. Quid clarius his dici potest? Fateor, inquit ETASTES, duo autem mihi adhuc obscura sunt, primum cur altera mulier nuda, altera vestita sit? deinde cur altera aviculam præferat? Si cogites, respondit DULODORUS, hortos Adonidis Veneri sacros fuisse, facile mihi dabis, aviculam illam Columbam esse, utpote quæ & ipsa Veneri dicabatur. Imo nec de nuditate, nec de vestitu dubium inquebis, cum & ipsa Venus inter Antiquitatis reliquias utroque modò haud infrequenter se sistat. Veneris honori hos Hortos instructos, ex modo allato Diogeniani loco audivimus. Sed addi potest & Theocritus Idyll. alleg.

Κύπρι Διονεία, τὸ μὲν ἀθανάτων ἀπὸ θνατῶν  
 Ἀνδράπων (ὡς μύθος) ἐπρίψας βερενίκαν,  
 Ἀμβροσίῳ ἐς στήθος ἀποστάλασσα γυναικός.  
 Τὴν δὲ χαρίζμενα πολυώνου καὶ πολύναις  
 Ἄ βερενικέα θυγάτηρ, Ἑλένα ἐκείνη,  
 Ἀρσινόα, πάντεσσι καλοῖς ἀτιτάλλει Ἀδωνι.  
 Πᾶρ μὲν δι' ὠρία κείται ὅσα δρυὸς ἄκρη φέροντι,  
 Πᾶρ δ' ἀπαλοὶ καὶ ποὶ πεφυλαγμένοι ἐν θαλάσσιον  
 Ἀργυρεοῖς.  
 Venus Cypria filia Diones, Tu immortalẽ ex mortalibus  
 Hominiibus (ut sermo est) fecisti Bereniceam,  
 Ambrosiam instillans in pectus mulieris,  
 Quare Tibi gratificans, o celeberrima, & multis delubris celebrata,  
 Berenices filia, Helena similis,  
 Arsinoë, multifariis bonis ornat Adonidem,  
 Juxta cum autem matura jacent quæcunque ferunt Arborum apices:  
 Adsunt & MOLLES HORTULI, inclusi CALATHUS  
 Argentei. &c.

De Avicula, excepit ETASTES, an Columba sit? nescio, annon jure dubitem; Licet enim hæc Veneri sacra fuerit, in Gemma tamen, quæ exiguitatem dignosci non potest. Quæcunque sit, subjecit DULODORUS, certè avis est. Avium autem genera inter cætera Adonidi sacrata omnia, idem Theocritus refert:

Πᾶν' αὐτῷ πετενὴν καὶ ἐρπετὰ τὰδε πάρεστι.  
 Omnia illi VOLATILIA & reptilia hic adsunt.

Inquit



Inquit in superiora sequentibus. Ex Scholiaste Theocriti, Infit ETASTES, Triticum & Hordeum in suburbanis satum, indeque in vascula translatum, Adonidis hortos didici constituisse: Quæso autem DULODORE, annon folia in Gemmis expressa latiora sunt, quam ut vel Triticici vel Hordei credi possint? Eadem, respondit DULODORUS, in his ratio esse potest, quæ & in iis, quæ Spes præferre solet. Hac segetem in herba adumbrant, & tamen & ipsa latiora solent effingi, quàm ut vel tritici, vel hordei, vel ejuscunq; frugum generis videri possint: Adeo ut, si in his peccatum sit, utique Sculptorum ea culpa credi debeat; Quanquam ne quid prætermittam, non semper Triticum & Hordeum, sed & Lactuca & Foeniculum hortos Adonidis constituerint. Testatur Hesychius, ejus en Tibi verba: Ἀδωνιδῶ κῆποι ἐκ τῶν Ἀδωνιδῶν ἡδωλὰ ἐξάγουσι, καὶ κῆποι ἐπ' ὄρεσιν, καὶ περὶ θαλάσσης ὀπίσσω, οἷον ἐκ μαρσάθρων καὶ θερμάκων φασκευάζουσιν αὐτοὶ τὰς κῆπους, καὶ γὰρ ὁ Θερμάκων ἀπὸν κατὰ κλίμα ἐστὶν ὑπὸ Ἀφροδίτης Φασίον. Ita & Suidas: Ἀδωνιδῶ κῆποι, inquit, ἐκ θερμάκων καὶ μαρσάθρων, ἀπὸ κατὰ τὴν ὁδὸν ἐν ὄρεσιν.

Non ausim amplius resistere, inquit ETASTES, Lactucam enim folia latiora habere, inficias non ierim. Qui autem fiebat, ut planta hæ tam cito creverint? Causa incrementi, respondit DULODORUS, Calor fuit; Ita enim Simplicius in Phyl. Arist. L. V. καὶ οὗτοί τ' ἂν θέρμῃ τῶν φύλα καὶ αὐξίῃ, ἐκ τῶν Ἀδωνιδῶν καλεσμένοις κῆποις, πρὶν τὴν ἐξάγειν καὶ πλεῖναι ἐν τῇ γῇ. Fuit & cura, ejus brevitæ & interitus causa fuit; Ideo enim curabant aut perderent, adeoque brevem Adonidis vitam adumbrarent. Eustathius rem edocet. κῆποι Ἀδωνιδῶν φύλα τῶν ἀναθαλλόντων καὶ πάλιν ἐκπύοντων τῇ θαλάσσῃ καὶ ἀφωριζόμενα κατ' ὁμοιότητά τινα τῇ γῇ τὸν ἀνέμωτον ἔδωκε θανάτου. ὅς αὐθίς αὖ νεοτῆτοι τῶν ἀπὸ θάλασσης καὶ ἀπὸ ἀέρος τῇ γῇ μὴ θοῶν. *Horæi Adonidis sunt planta subito regerminantes, & statim projiciuntur in mare, & evanescentes, ad similitudinem quandam mortis, quam subiit, brevis Fati Adonis.* Zenobius Cent. I. Prov. XLIX. non in mare, sed in puteos præcipitatos scripsit. Γίνονται ἢ ἐπὶ οἷς κῆποι τὸ Ἀδωνιδῶν, οἷς ἀγρὸν κατέχουσιν ἀνεσθύνοντες, ἀλλὰ χλοῶν μόνον. Εὐφρίστῃς ἢ ἅμα πλουτῶν τῇ θείῃ καὶ ῥίπτονται οἷς κῆποις. Itane se res habebat? excepit ETASTES; Non igitur mirabor, quæ κῆποι Ἀδωνιδῶν contra futiles & nugones homines, & voluptariis ineptis deditos, ejusmodi sunt Cantores, Sophistæ, Poætæ, Lascivi, Cupedarii &c. in proverbium abierint; brevis enim ut video & horum delectatio est. Brevis, inquit DULODORUS, & plerumque infructuosa, adeo ut paræmiam etiam hoc modò offerri, horum author Erasmus testetur: ἀκαρπότης τὸν Ἀδωνιδῶν κῆπον, *infructuosior Adonidæ Hortu.* Sed de his hæcenus. Sequitur ex Gemmis 108. & 664.

30 14 36  
**DIOMEDES**

Palladium auferens.



Ego, excepi **ETASTES**, non hunc in his Gemmis agnoverim, sed in *prima* Bellonarium, in *secunda* fœminam cum Palladio, qualis typus Nobilitatis esse solebat. Nobilitas, respondit **DULODORUS**, non Palladium, sed imaginẽulam præfert, idque idẽ, quod Nobiles ius ponendæ imaginis habuerunt. Adde, quod nec fœmina in Gemma sit, sed omninõ Vir, qualem & in *Thesaurò* Elector. Brandenb. vidimus, eodem ferẽ habitu, nisi quod gladium sinistra teneat. Plura ibi de *Diomede* me legisse memini, inquit **ETASTES**, idẽque de *secunda* Gemma id tibi facilius assurgõ: de *prima* autem, nisi rem eadẽ claritate doceas, ignosces, si difficilior fuero. Quid? annon Bellonarium Bellona arguit? annon Bellonarius districto ense adstat, ut se vulneret ex ritu sacerdotii? Si Bellona hic foret, responderi **DULODORUS**, pro Bellonario sentirem & ego: Cũ autem Palladium sit, non minus ac in altera Gemma, omninõ pro *Diomede* decernerem. Palladium, subiecit **ETASTES**, minutum Palladis simulacrum fuit: Palladem autem & Bellonam fuisse eandẽ, quis nescit? Id quidam credidẽre, respondit **DULODORUS**, idque idẽ, quod eadẽ utrique opera interdum Poetæ tribuant. Simulacra autem diversa fuisse, inde colligas, quod Tuba, Fax, & Falx, Bellonæ tribuantur, quæ tamen à Pallade alienæ sunt: Ut comam faciam, quam & ipsam sanguine multo spargere memoratur. Audi Statium L. IV. Theb.

*Prima mari rutilum de vertice Larissæo*

*Ostendit BELLONA FACEM.*

Et Silium Italicum L. V. Pun.

*Ipsa facem quatiens ac flammam SANGVINE multo*

*Sparsa COMAM medias acies BELLONA pererrat.*

Et Claudianum L. II. in Eutropium.

*Quid dudum inflare moraris*

*Tartaream BELLONA TUBAM? quid stringere FALCEM*

*Qua populos à stirpe metis?*

Imò, reposuit **ETASTES**, etiam *Hastam*. & *Parmam*. & *Galeam* gestasse legitur, qualiter utriusque & *Pallas*. Audi eundem Statium L. II. Theb. fin.

*Nec magis ardentes Mavors, HASTATAQUE pugna*

*Impulsi BELLONA Tubas.*

Audi



Audi eundem Claudianum, de IV. Conf. Honorii:

*Jam Trabeam Bellona gerit, PARMAMQUE removis  
Et GALEAM.*

Etiam si hoc Tibi cedam, regessit DULODORUS, tamen in proposita Gemma Bellonam esse, cedere non possum. Palladem sive Minervam, ingenium bellicum: Bellonam autem, furorem bellicum denotare, Cartarius docet. Hæc differentia ad distinguenda Palladis & Bellonæ simulacra admodum necessaria est; Ut enim Ingenium interdum furore corripitur, unde Minerva in ipso bellandi actu etiam credi potest expressa, qualiter in Domitiani Nummis occurrit: Ita & furor interdum Ingenii speciem induit, & inde poterit hastam & Clypeum & Cassidem mereri, sed tamen non poterit extra bellandi actum effigiari. Nam hic Bellonæ proprius est. Et ex his constat, foeminam galeatam, sinistra Clypeum tenentem, dextrâ autem hastam torquentem, rite & *Palladem*, & *Bellonam* vocari; foeminam autem habitu pacifico stantem, licet & *Galea* & *Clypeo* & *Hasta* armatam, qualis in Gemma nostra visitur, Palladem quidem esse, Bellonam autem nullò modo esse; deficit enim furor bellicus, sine quo Bellona intelligi non potest. Profundè philosopharis, inquit ETASTES, si verè, me cecidisse fatebor; Quamquam nondum intelligam, quomodo ad Diomedem adstans aræ figura reduci possit? Diomedes cùm Palladium auferret, galeatus fuit, & ita etiam apud Eruditissimum Fabretum in Tab. Iliacâ pingitur. Galea non obstat, respondit DULODORUS, cùm utique capite nudo non tantum in Gemma prima occurrit, sed etiam in ea, quam in Thesauro Elector. Brandenb. protuli. In utraque, excipit ETASTES, aræ insidet Diomedes, Palladiumque jam manu præfert, in proposito autem manum dextram capiti imponit, sinistra gladium tenet. De gladio, subjecit DULODORUS, dubium non est. Fabella, quâ Diomedes Ulysses, gladio ante se egisse apud Phorium Cononi memoratur, rem abundè demonstrat. Manus capiti imposita fortassis Pietatem Diomedis, fortassis etiam lætitiâ demonstrat. Qui Minervam ubique & coluit & adjutricem habuit, uti videre est ex precatione ejus, apud Homerum Il. K. v. 283. seqq. credibile non est, Palladium non propitiato Numine attigisse. Propitiatum Numen vel inde colligas, quod Quintus Smyrnæus Minervam volentem abstractam cecinit:

*Ἀρπάζας ἐθέλουσαν εὐφρονα Τριτογενείαν.*

*Abstrahens (Diomedes) volentem sapientem Minervam.*

Inquit Lib. X. v. 353.

Hæc si ita sint, perrexerit ETASTES, qui fit, ut aliis Scriptoris factum culpeatur, tanquam sceleratum?

*Tydidēs sed enim, scelerumque inventor Ulyssēs*

*Fatale aggressi sacratō avellere templo*

*Palladium, casis summa custodibus arcis*

*Corripuere sacram effigiem, manibꝫque cruentis*

*Virgineas ausi Divæ contingere vitas.*

Inquit Virgilius Æn. II. v. 163. seqq. Virgilius, regessit DULODORUS, hōc locō Æneam Græcorum hostem inducit, quem quid mirum est factum carpere? Sed si hoc

D

displi-



displicet, non tamen displicebit, quod de læticia dixi, quam procul dubio Diomedes sensit, cum voti se jam compotem juxta Palladium intelligeret: Herculem se ipsum ob Victoriam Olympicam coronantem, eodem modò in Numismate inter selecta Cardinalis Maximi cernimus: Eodem modò & sacrum Agonem, in Numismate Commodi Theatri Electoralis Brandenburgici, quod & ipsum in specimine Cl. Morellii extat: Non futili argumento, & Diomedem hic adumbrari, eò modò, quò Palladio jam vicinus se voti & victoriæ quasi compotem sentiens, vel Deam propitiaverit, vel certè meriti Coronam sibi imposuerit. In sequenti Gemma 6. visitur

## O B L A T I O

Primitiarum.



Gemma hæc, inquit ETASTES, mihi notabilis videtur; Quid enim si Nuptiæ per confarreationem, junctis cocuntium manibus, eà exhibeantur? Nescio an assertum tueri possis, respondit DULODORUS. Et quidni? perrexit ETASTES. Annon Sponsa far frugesque in Altari ignibus imponit? Annon Sponsus affundit aquam? Annon iis, ad Sacri solennitatem, ritè augendam adest Tibicen, & velut Juno Pronuba, cum Sceptro, apportans canistrum frugibus plenum? Si dubitas, consule Lipsium ad Taciti Annales Lib. IV. c. 16. Consului Lipsium, inquit DULODORUS, sed nihil, quod ad rem facere posset, inveni. Nihil? mirabundus subjecit ETASTES. Annon farre Nuptias fieri dicit, cum per Pontificem Maximum & Dialem Flaminem, per fruges & molam salsam conjunguntur? Aurion confarreationem eò ritu ait perfici, ut aqua & igni adhibitis, duobus maximis instrumentis, Natura conjuncta videatur? Id fateor, reposuit DULODORUS, quid autem hoc ad Gemmam? Quid? regessit ETASTES, annon fruges? annon & aqua & ignis in Gemma ad oculum patent? Pateant, inquit DULODORUS, in Gemma tamen Nuptias confarreatas non evincunt; Cum tamen & manus junctæ sint? excepit ETASTES; Neque enim lævas arbitraberis, cum ceris expressæ dextræ forent, id quod Sculptor observare debuisset. Res dubia est, respondit DULODORUS, mihi sanè hæc manuum, non tam conjunctio, quàm lotio videtur, quam in Sacrificiis receptam, ex Hesiodo in Operib. docemur:

Μηδὲ ποτ' ἐξ ἡοῦς Διὶ λείβειν αἶθρα πα ὄνον  
Χερσὶν ἀνίπτουσιν, μηδ' ἄλλοις ἀθανάτοισιν.

Neque

*Neque unquam manē Jovis libato nigrum unum  
Manibus illotus, neque aliis immortalibus.*

Si manus junctæ rem non conficiant, subjicit ETASTES, in reliquis nescio an firmi quid pro Nuptiis confarreatis invenire possim; neque enim Sellæ jugatæ, ovilique pelle instratæ, hic visuntur: neque velata nubentium capita, quæ tamen & ipsa, Lipsio teste, ad Nuptias confarreatas requirebantur: Nec est quod Solis Pontificibus has cum Cl. Pfeiffero addicam, cum hæc ratione causâ apertè casurus sim, utpote quod ne minimum quidem Pontificii ornatûs vestigium in Gemma sit. Solis Pontificibus, reposuit DULODORUS, Nuptias confarreatas non addicerem: Imò nec Sellas ovili pelle instratas de essentia earum arbitrer, adeo ut hinc à me nihil metuendum sit: Quamquam, ut verum fatear, nec in habitu aliquid Nuptiale emineat; Uterque enim Sacrificantium distinctus est, non minus ac Tibicen, id quod nos admonere potest illius Virgilio,

*Unum exuta pedem vinculis in veste recinctâ:*

Ad quem locum Servianæ Schedæ Danielis: *Solent, inquit, & resolutoria Sacrificia ab Auspicibus fieri. & ad Junonis Lucina sacra non licet accedere, nisi solutis undâ.* Junonis? excepit ETASTES; At hæc in Gemma indubia est. Nihil minus, respondit DULODORUS, licet enim Sceptrum tale quid arguere videatur, indignum tamen foret, Dearum Deorumque Reginam canistrum frugibus plenum apportare, adeoque Sacrificii ministram agere. At, inquit ETASTES, præterquam Junoni resolutoria sacrificia non fiebant? Imò & aliis Diis, respondit DULODORUS, nam apud Tibullum EL. V. L. I. Poëta:

*Ipse ego velatus filo tunicisque solutis  
Vota novem Trivia nocte silente dedi.*

Sceptrum, subjicit ETASTES, mihi firmissima basis est; Hoc enim nisi Deorum Reginæ non convenit. Et quis pro Sceptro, reposuit DULODORUS, indubiè hoc sumat? Idem sane gestat apud Gortæum etiam in Gemma 16. foemina laurum adurens, quæ procul dubio rustica est, mutuaturque lucem ex illo Tibulli:

*At Lanrus bona signa dedit, gaudese Coloni:  
Discedet spicæ horrea plena Ceres.*

Nisi fallor, inquit ETASTES, caput etiam coronatum cernitur. Non aliter, respondit DULODORUS, ac apud Virgilium,

*Copa Syrisca caput GRAJA redimita MITELLA:*

Scil. foeminam quandam, rure fruges apportantem, hanc arbitrer. Sed id ad rem parum. Præcipuum contra Nuptias confarreatas argumentum, Spicæ sunt. Spicæ? mirabundus iteravit ETASTES. Has ego præcipuum argumentum pro confarreatione arbitrabar. Quo jure id feceris, inquit DULODORUS, ipse videris. Ad Nuptias confarreatas sanè non spicæ adhibebantur, sed FARREUM, à quo & appellatio descendit. Audi Plinium: *In Sacris, inquit, nihil religiosius CONFARREATIONIS vinculo erat, neque Nuptæ FARREUM præferebant.* Sit ira, excepit ETASTES, sed dilucidandum quid farreum sit? Farreum, regressit DULODORUS, si Festo credis, fuit Libi genus, ex farre factum. Dionysius Halicarnassæus ejusmodi Nuptias à farris communione,

nione, *καὶ οὕτως*, *farracia* dictas author est: à communione, inquam, id quod Rosinus & Stuckius eò intelligunt, quod Coniuges eòdem farre vescerentur, & Victimæ respergerent, quod utique in crudis frugibus credibile non est. Ulpianus rem clarius docet: *Farre*, inquit, *convenitur in manum certis verbis, & testibus decem presentibus, & solemnibus sacrificio facto, in quo PANIS FARREUS addibetur*. En! panem farreum nominat, non spicas, quales in Gemma videntur, adeò ut ex omnibus hæcenus dictis luce meridiana clarius sit, non confarreationem hic adumbrari, sed omninò frugum primitias offerri, non minus ac numero 101. & 109. De frugum primitiis, inquit ETASTES, res obscura non est, constat enim ex Porphyrio Lib. de Abstinencia 4. etiam præcis Atheniensibus id Sacrificii genus in usu fuisse; Et de more Romano est Tibulli versus:

*Ille Deo sciet agricola provitibus Uvam,  
Pro segete spicas, pro grege ferre dapem.*

Ego autem de Nuptiis confarreatis plenius informari cupio. An harum inter Antiquitatis reliquias nulla prostat imago? Me iudice prostat, respondit DULODORUS, & quidem in sequenti Marmore:



Marmor hoc, subiecit ETASTES, à Sancto Bartolo inter Admiranda Romanorum delineatum vidi, meminique à Celeberrimo Bellorio esse illustratum; Sed ille, licet de Nuptiis fateatur, de Nuptiis confarreatis tamen ne verbum quidem habet. Et qui posset, respondit DULODORUS, cum in manu Sponsæ Turturem crederet, quem & Sanct. Bartolus delineavit? An res aliter se habet? Interrogavit ETASTES. Habet, regeffit DULODORUS; Pighius enim, ex cuius schedis hoc Marmor vulgamus, non Turturem, sed FARREUM in manu Sponsæ delineavit apertò argumentò, Nuptias confarreatas in Marmore exhiberi. Pighius, inquit ETASTES, Marmor mutilum dedit, ac Sanctus Bartolus dedit integrum. Quid inde colligas, si non maiorem Bartolo quam

quàm Pighio fidem esse habendam? Imò contra, respondit DULODORUS. Bartolus Pighio posterior fuit, cùmque Marmor jam Pighii ætate mutilum fuerit, quomodo potuit à Bartolo integrum delineari? Annon hinc patet, Bartolum fragmenta supplevisse, adeoque fidem ejus Pighio inferiorem esse? Solemnem Nuptiarum hic ritum adumbrari, inquit ET ASTES, negare non ausim. Sponsus & sponsa invicem destras jungunt, hæc flammeo velata, Ille capite detecto: Pronuba Juno utrumque amplexa connubio jungit stabili: Adest Hymentæus, seu Puer genialis, præferens facem. Ad aram Sponsus velato capite sacrificat, Sponsa autem capite detecto vilitur, adduciturque ad aram Ovis: sequitur mulier cum serito, quò postes ornabant, inde nuncius volumen Nuptialis carminis tenet, ultimaque est Concordia sive Cybele, cujus vim generationi inesse credebant. Cautè incedis, excepit DULODORUS. Notandum autem, Sanctum Bartolum ante aram virum, sacrificantem & è canistro flores & poma, in Nuptiis spargi solita, deponentem finxisse, quòd in nostro desit: Notandum, ad columnas eum Camillum cum acerra, & Tibicinem fecisse, qui licet eos non negemus, tamen in nostro Marmore nosci non possunt: Notandum, figuras retrò sponsum & sponsam à Bellorio determinatas non esse, quos tamen pronubos & pronubas, haud forsitan ab ratione credimus. De his si plura desideres, adi Eruditissimum Pfeifferum in Antiquitatibus Græcis L. XII. c. 13. Non hoc me angit, inquit ET ASTES. De Ove vellem audire; Hanc enim non Talasionis tantum ac lanificii fuisse argumentum, sed & sacrificio oblatam, Bellorius arbitratur, cùm tamen in Nuptiis portam, mactare, solenne fuerit. Id Nuptiarum initio fiebat, respondit DULODORUS. Ita enim Varro L. II. de re Rust. Nuptiarum initio antiqui Reges ac sublimis viri in Etruria in conjunctione Nuptialis nova Nupta & novus Maritus primum PORCAM immolabant, Imò ante Nuptias, uti ex Jul. Polluce, L. III. Onom. c. 3. n. 4. patet. Η ἡ περὶ γάμου θυσία, περὶ τέλεια καὶ περὶ ἀμειν. περὶ τέλειος ἡ ἱερότης ἢ μόνον αἱ νέμφαι ἀλλὰ καὶ ἐν νέμφιοι, &c. Sacrificia ante Nuptias facta περὶ τέλεια primordia & περὶ ἀμειν, ante Nuptialia, vocantur. Initiari verò non modò Sponsa, sed & Sponsi dicebantur. Vides ET ASTA, Sacrificium Porcæ, Sacrificium Ovis non excludere, non minus ac Tauri aut Vacca. Ut enim illam Veneri, ita Taurum Jovi & Junoni, Vaccam Lucinæ, Concordiæ Ovem videntur obtulisse: Idque secundum Senecam Tragicum in Medea, ubi Chorus:

*Ad Regum thalamos Numine prospero,  
 Quis cælum superi, quique regunt fretum  
 Adsint, cum populis ritè faventibus.  
 Primus SCEPTIFERIS colla TONANTIBUS  
 TAURUS celsa ferat tergore candido:  
 LUCINAM nivei FOEMINA corporis  
 Intentata iugo placeat, & asperi  
 Martis sanguineus quæ cohibet manus,  
 Quæ dat belligeris fœdera Gentibus,  
 Et CORNU retinet divite COPIAM,  
 Donec TENERA mihi HOSTIA.*

Appositè hoc, inquit ETASTES, ad Concordiam in Marmore expressam. Cornu sanè, cum divite copia, ea apertè retinet, quid autem turrata est? Corona turrata, respondit DULODORUS, Cybeles indicium est, ut rectè censet Bellorius, ejus enim index est & Nux pinea in cornu copiae: Neque miraberis ejusmodi conjunctionem, cum diversorum Deorum insignia in signis Pantheis notissima sint. De Ove autem omnino est notandum, etiam in hoc pro Nuptiis confarreatis argumentum latere, modo verum sit, quod Lipsius observat: *In Nuptiis confarreatis Selloe jugatas Ovili pelle instratas fuisse, ejus Ovis, qua hostia fuerit.* Sed ad alia pergitur. In Gemma 673. est

## IDOLUM SOLIS.



Cautius agerem, inquit ETASTES, simulacrum agnoscendo basi insitens, Pileo, Facie & Clypeo instructum, ad quod accedit mulier item pileata, crinibus passis. An hoc non sufficit? Non arbitror, inquit DULODORUS, hoc enim est verba dare, non causam, non originem inquirere. Sed, excepit ETASTES, unde Tu simulacrum hoc, Idolum Solis probabis esse? cum tamen nullibi Sol hanc modò adumbretur? Nullibi? subjecit DULODORUS, at non multum differunt simulacra Mithriaca. Taurum ea mactare solent, reposuit ETASTES, non Facem, non Clypeum præferre. Addo & Pilei differentiam: In simulacris Mithriacis Phrygius esse solet, in propolito autem Græcus videtur. De Pileo facilè Tibi cesserim, perrexit DULODORUS, cum non Ulyssem tantum, sed & Dioscuros talibus insignes videam; Cum autem in Dioscuris Pileus quibusdam alterum Terræ hemispherium designet, quidni idem statuamus in hoc Idolo Solis, cum Sol alterum tantum hemispherium fulgore complectatur? Quid autem de face dices? subjecit ETASTES. Annon hæc Phosphorum potius aut Hesperum designabit, quibus in Tabulis Mithriacis Lampades dari in confesso est? Si Lampas sola esset, recessit DULODORUS, assurgerem placito: Cum & Clypeus junctus sit, pro Sole decernendum arbitror; Soli enim & facem & Clypeum datum, apud Martianum Capellam, de Nuptiis Philologia, me legisse memini. De simulacro Solis inter cætera, *Sinistrâ autem manu, inquit, Clypeum coruscantem, dextrâ ardentem Facem præferebat.* Martianus Capella, inquit ETASTES, non facem tantum, & Clypeum Soli tribuit, sed & Coronam radiatam, Gemmisque pluribus ornatam, pedesq; alatos, & pallium coccineum, quæ in nostra Gemma non videntur. Qualiverò, respondit



spondit DULODORUS, omnia Solis ornamenta necesse fuerit effingere? Annon suffecerint præcipua? *Fax & Clypeus*, quorum illa ardorem, hic figuram ejus denotat? Ita enim Interpres Capellæ: *Per Clypeum*, inquit, *formam accepimus, quæ nobis videtur ancilis modum non excedere.* Clypeus autem dicitur à Græcorum *κλίπυρ* Σοῦμας, sive ab eo quod est FURARI CORPORA, vel à CLUO, quod est DEFENDO. Pacem autem ejus intelligimus multitudinem ardentium; Sed & illud notandum, in Gemma Idolum hoc eodem modò insignia hæc gestare, quò & Sol apud Capellam, dextrâ scilicet facem, sinistrâ autem Clypeum. An hoc, excepit ETASTES, certâ ratione, an temerè factum sit? videtur adhuc dubitari posse: Imò non potest, respondit DULODORUS, Ita enim pergit item Interpres. *Quod hanc (scil. facem) Sol in dextrâ, illum autem (Clypeum) in sinistra habet, modum armis sustinendis servavit, vel fortè quia Clypeum semper secum tenet, facem autem amittere debet, atque ideo dextrâ, quæ agilitior, ea sustentatur.* Quicquid sit, inquit ETASTES, Coronam radiatam, & alatos pedes, & pallium hic deesse video. Quod ad alatos pedes attinet, regeffit DULODORUS, hos nullibi Solis simulacra præferunt, & si vera sit hypothesis eorum, qui Solem stare, Terram autem moveri perhibent, nescio quid alæ Solis simulacris afficit, denotare possint? adeò ut hinc apertè constet, alatos pedes necessariò non requiri, affingi tamen posse, ut celeritas motus adumbretur, quæ Soli communiter tribuitur. Ad Coronam radiatam quòd attinet, ea apud Martianum Capellam aliud non videtur indigitare, quàm duodecim, menses; ideo enim duodecim radii, & totidem Gemmis, dicitur insignis esse. Cùm autem annum in menses distinguere, secundaria Solis operatio sit, utique constat, coronam radiatam præcipuis Solis ornamentis accenseri non debere, idque eò minus, quòd clarius in simulacro extensa fax operationem primariam refert, Lucis scilicet, sine qua Sol ne intelligi quidem potest. De Pallio non arbitror pluribus dicendum. Ipse enim ab Idoli tergo etiam in Gemmâ id videas pendere. In Annulo x̄i.

## VITA

Justorum, militia



Adumbratur; Nam Caligam militarem hanc esse facile credidero. Id mirum, inquit ETASTES; Quid enim militaris Caliga ad foeminam Christianam? In B. Agnetis Cœmeterio Annulum hunc inventum, Botius testatur in Roma subterranea, ex qua Annulus

lus defunctus est: Indeque, quid si non Caliga militaris hæc videatur, sed Solea, quam apud Veteres fœminis in usu fuisse, Balduinus latè demonstrat? Non assentior, respondit DULODORUS, Caligam enim militarem clavi, in eo apertissime notati, arguunt: Clavi, qui in solea propriè sic dicta non occurrunt, quibusque, tantum non solis, à solea militaris caliga distinguitur. Negare non ausim, excepit ETASTES; apud allegatum enim Balduinum caligam militarem clavis suffixam vidisse memini; Quid autem hoc ad fœminam Christianam? Ut innuatur, regressit DULODORUS, Justorum, ut dixi, vitam militiam esse: Militant nempe contra peccatum, contra Satanam, & contra propriam carnem. Hanc Justorum militiam esse, perrexit ETASTES, inficias non iterum; Cur autem Caliga militaris ea symbolo præfigeretur, non video. Quidni potius vel Casside, vel Thorace, vel Clypeo, vel Gladio: notioribus militiæ insignibus? Ratio in promptu est, reposuit DULODORUS: Nihil in Sacris communius est, quam vitæ cum ambulatione comparatio; Ad vitam igitur, & quidem militiæ plenam, expriendam, quod symbolum concinnius eò, quod ambulationis & quidem militaris instrumentum est? Ita ad vitam militarem symbolum reducitur, inquit ETASTES, an autem ad vitam Justorum? dubitem. Quod dubites, subiecit DULODORUS, causa non est; cum utique inscriptio JUSTUS rem apertè determinet. Quasi verò, inquit ETASTES, vocabulum hoc necessario appellativum sit; quid si nomen proprium? Et quidem ejus, qui Annulo hoc signavit? Id locus respuit, regressit DULODORUS; Vix enim credibile est, profani militis insigne in Virginis Christianæ sepulchro conditum fuisse. Sed ecce! In Annulo 101.

## SALUS Christianorum



Se sistit. Etiam hunc Annulum proponis? inquit ETASTES. Quæ rei ratio? An satis dilucidatus non est? Atqui Annulus Christianus cum salutari nomine ex Roma Subterranea vocatur: Et quid addi poterat? Multa, respondit DULODORUS; Quanquam præcipua causa, ut denotè proponendum censeam non tam obscuritas sit, quam Sculpturæ in reculo Goræo, ab eo differentia; qui in Roma Subterranea exhibetur. In reculo Goræo, loco Serpentis puer alatus cruci aditans exprimitur, subscriptumque

vocabu-



vocabulum SALUS omnino omittitur, cum tamen in Roma Subterranea Annulus hic eò planè modò occurrat, quò hic eum delineatum exhibeo. Si hoc ita sit, exceptit ETASTES, optimè sanè facis, quod Publico illudi non sinis; Ipse enim dubius sui, qui Cupido ad Crucem Christianam quadraret? Cupido mihi non videbatur, reposuit DULO DOR US, sed vel Angelus, vel Anima. Bosius autem, & Aringhius, aliter docuère. Serpens, perrexit ETASTES, Cruci salutiferæ apprimè quadrat, non tantum quòd symbolum is Salutis etiam Ethnicis fuerit, sed etiam quòd æneum illum Serpentem, Christi Prototypum, designare possit, cujus adpectus à morsu Serpentum igneorum Israelitas salvos præstitit. Ratio hæc, subjecit DULODORUS, mihi potior videtur, quàm Aringhii, qui ad Sathanam, veterem illum Draconem, virtute Crucis devictum respicit; licet enim in Numismatibus eum sub Cruce aliquando occurrere, non negem, Æneum tamen Serpentem subscriptio arguit. Columbæ, insit ETASTES, adhuc dubium movent, videlicet annon Serpens hic ad has pertineat, junctisque his exprimatur Servatoris præceptum: *Esote prudentes ut Serpentes, & simplices ut Columba?* Aringhius etiam hanc rationem adducit, respondit DULODORUS, cum autem eodem demonstrante Columbæ Piorum symbolum sint, & 12. Columbæ, in alio monumento Cruci tessellatæ appositæ, duodecim Apostolos designarint, nihil dubitarem etiam hic Pios intelligere, Christi scil. crucifixi fiducià salvos. Fortassis, inquit ETASTES, ut in allegato 12. Apostolos, ita & hic Mariam & Johannem, quos Christus Cruci affixus allocutus memoratur. Nisi omnium piorum, respondit DULODORUS, hos locum arbitreris tenere, non dixeris; Non enim hi tantum, sed omnis Piorum cœtus, meritò Christi Salutem spirant: Christi, qui ut æneus Serpens, ita & α & ω, quæ afficta sunt, id est, principium & finis est, ut ipse se vocat, in Apocal. Joh. Hoc ob scurum non est, inquit ETASTES, imò nec monogramma; tali enim Christi nomen in Numismatibus Imperatorum Christianorum frequentissimè pingitur, sed huic Monogrammati adhuc litera T. videtur imposita. Hæc quid quæso designet? Ipsam Crucem, respondit DULODORUS, de qua re cum Docti sufficienter docuerint, ego taceo; præsertim cum in Annulo 5. & Gemma 83. enodandum sit,

## FIDES PUBLICA

Cur Spicas & Calathum cum frugibus præferat?



E

Ratio

Ratio incognita non est, excepti ETASTES. Augustini sententia innouit. Innouit & Tua, qui rejecto Augustino Fidem respectu Personarum publicam dici statuis, fidei; proprium esse asseris, ut ea rerum publicarum felicitatem contineat. Innouit & eorum, qui fruges fidei publicæ ideo affectas arbitrati sunt, quod in Sacris ei fuerint oblata; Sed mihi nihil horum satisfacit. Fides enim publica non alia videri potest, quam cui contrarium dicit Quintilianus in Declamatione XII. *Non enim vulgaris ista labes frumenti fuit, nec qualis aliàs ab agricolis accusari solet, perflitia terrarum, & ingrata mensis irritus labor.* Et de qua Plinius L. II. Hist. Nat. c. 63. terram laudans, *quàm bonâ fide creditum fœnus reddidit.* Quid clarius ad rem dici potest? Nihil video, inquit DULODORUS. Ex Cicerone ego, fidem *dictorum conventorumque constantiam & veritatem* didici definiri, indeque appellatam, *quod fiat, quod dictum est:* Quæ autem conuenta, quæ dicta, adeoque quæ Fides terrarum, propriè intelligi possunt? Annon ex his Ciceronis apertissimum est, fidem de terra allegatis in Quintiliani & Plinii locis impropiè & *καταχρηστικῶς* usurpâri, adeoque simulacro causam dedisse non posse? Aliter cum Cicerone Sallustius non uno in loco. Fidem publicam eam appellat, quam personæ publicæ præstant. L. Tarquinius, inquit, *in Senatum adductus, cum se diceret de Coniuratione indicaturum, si FIDES PUBLICA data esset, iussus à CONSULE, quæ sciret, edicere.* Fides publica, excepti ETASTES, hoc loco pro eo sumitur, quod vulgò *salvum conductum* vocamus, quid autem hoc ad figuram fidei publicæ cum spicis & calathò frugifero, in Gemmis & Numismatibus expressæ? Minimum, respondit DULODORUS, illud ex hoc loco patet, fidem publicam à Personis publicis præstari solere; Fides enim publica à Consule, & postulata & data memoratur: Consulem autem Personam publicam esse quis ignorat? Aliter mihi videtur, subjecit ETASTES; Spicæ enim & calathus in fide publica quidni personarum etiam privatarum, & rerum æque privatarum privatorumque esse possint? Non arbitror, regressit DULODORUS, cum utique ipsum fidei hujus Epitheton privatos amoveat. Id adeo verum est, ut ne quidem eò sensu hæc Privatorum esse, opinari possimus, quod per fidem publicam privatis tribuantur; ex quo enim tributa sunt, fidei publicæ esse desinunt. Potius Fides publica hoc in schemate ideo & canistrum frugibus plenum credi debet præferre, quod Personæ publicæ adtribuendam Reipublicæ felicitatem se obligare soleant. Hæc equidem dicis, inquit ETASTES, sed velim etiam probes. Unicò, subiunxit DULODORUS, testimoniò rem perfecero. Quid dices ad Numisma Plotinæ, quod hic appono,



Jamdudum ab Angelono vulgatum? Annon in hoc eadem Fidei publicæ figura, quæ & in Gemma, & aliis Numismatibus visitur? At hæc non FIDES TERRARUM, non fides privatæ alicujus vel Personæ vel rei, sed FIDES AUGUSTI inscribitur, Augusti, qui ut publica persona est, ita & publicè se obligare solet: Et ad quid? Nonne ad felicitatem publicam & procurandam & conservandam? Felicitatem publicam, inquam, cujus fruges & spicas symbolum esse, ad Gemmam Gorlæi VI. utique indubium est. Hæc si ita sint, inquit ETASTES, quid judicii feram de Gemma ea, in qua fulmen fidei publicæ junctum est? Annon hoc factum est, ut ab aëre dependere id totum intelligeretur? Tuæ hypothesei infervis, respondit DULODORUS, reverà autem fulmen, symbolum Providentiæ est, uti in vulgus patet: Et quàm concinnè Providentia, fidei publicæ, sive Augusti jungitur, cum hujus ex providentiâ felicitas publica exsurgat? Sed hæc hæctenus. Colophonis loco subijcio

## VULGARIA QUAEDAM.



Si vulgaria sint, inquit ETASTES, quid necesse est ea denuò adducere? Vulgaria sunt Peritis, respondit DULODORUS, cum autem Libri ejusmodi non his tantum, sed & aliis publicentur, præcavendum utique, ne quis rerum minus adhuc peritis in errorem inducatur. Pastor in priore Gemma Caprum, animal arboribus noxium observat, adeoque non tantum pascit, sed & cavet, ne quid detrimenti det. Mira sapientia! exclamavit ETASTES, qualiverò non id potius hic exprimatur, quod Hyginus fab. 274. Capr vitem, quam præferat, plenius fructum protulit, undeciam putationem

*indenerunt*. Annon enim hoc, sicut ab Hygino de Vite narratur, ita ab aliis de Olea & narratum & creditum videtur? certè à Scalptore Gemmæ nostræ, & tot aliarum? Rationes hæ, regeffit DULODORUS, liceat fateri quod res est, sanè perquam fragiles sunt; Quis enim non videt, aliud statuendum in Capro vitem rodente, aliud in Capro arbori infesto? Vitem quòd roserit Caper, uberrimas uves provenisse, Hyginus apertè ait, indeque putationis, vitium scil. originem arbitratur descendisse: Quanquam hoc, Pausanià in Corinthiacis teste, Naupliæ incolæ de Asino memorârunt. Sed esto! credamus de Capro; Talem enim & in sequenti MSCti Pighiani Marmore cernimus



Sed an idem etiam extendere licebit ad Oleam, aliasve arbores? Neutiquam! Hæ enim à Capris arrosæ non feraciores fiunt, sed damnum capiunt & emoriuntur, id quod in Thesaufo Elect. Brandenb. & ex Plinio & ex Theocrito demonstravi. Hæc cum ita sint, utrique nec putationem inde deducere licebit, nec etiam causâ crit, cur me poenitere debeat sapientiæ illius miræ, quâ officium pastoris his in Gemmis adumbrari dixi, quòd scilicet non sufficiat, ut greges pascantur, sed videndum etiam sit, ne quid detrimenti dent: Optarem potius, ut simili etiam alii urerentur, calamoque tutius agerent, nec tantum cupidas aures pascere, sed & sedulo caverent, ne sanctissimis veritatis fontibus aliquid damni inferrent. Ex hætenus dictis, exceptit ETASTES, à vulgata sententia dimoveor: Imò etiam ex dicendis, respondit DULODORUS; Quid enim est, quòd in Gemma *secunda*. Hora statuitur, allegatis in rei fidem Angelono & Ant. Augustino, cum tamen apud utrumque globus, quem figura hæc præterdit, deficiat? Scil. non Hora hæc est, sed Æternitas, quæ eodem planè modò, quo hic visitur, cum velo scil. circum caput volante, & globo dextrâ prætenso, in Nummo Faustine apud Bixum T. 43. ÆTERNITAS inscribitur. Sed quid ad Gemmam *tertiã*? quæsitit ETASTES: Caput hoc, respondit DULODORUS, Libero Patri addicitur, cum tamen floribus redimitum sit; adeoque non Bacchum, sed Floram apertè referat. In *quarta* Gemma, subjecit ETASTES, Sphingem typum Ægypti video, an etiam hic opinionem carpis? Carpo, subjunxit DULODORUS; Sphinx enim alara

est,

est, quales *Ægyptiæ* non fuere. Potius ad Augustum referrem, qui Sphinge pro sigillo usus, Suetonio memoratur: Nisi etiam ad Chios respicias, qui Sphingem ob Homeri Naxos etiam Numismatibus expressere: Aut in ænigmatum involucris subsistas, quæ Sphingis simulacro expressa, Eruditi jam dudum observarunt. An idem error, Interrogavit ETASTES, etiam in Marte est, qui in Gemma quinta visitur, nam & hunc Te producere video? Ideo id fit, subiecit DULODORUS, quia, procul dubio ob adjectum Scorpionum, aliquis Africanorum eò creditur notari, cum tamen stella in Clypeo, Martem Planetam hic exprimi, aperte arguat: Martem inquam, de quo, uti jam in Spicilegio monui, Manilius cecinit:

*Mavortis Scorpionu hæret.*

Quid clarius ad Gemmam dici potest? Fateor, inquit ETASTES, & jam gestio etiam de reliquis Tuam sententiam audire. In Gemma sexta, excepit DULODORUS, agnoscunt Leonem cum Gallinaceo, super quem transiliat: opinanturque, eos simul decurrere; cum tamen Gallinaceus lento omnino passu procedat, productoque collo & capite protenso, cantantis speciem referat, adeo ut Leonem Galli cantum formidantem, id quod vulgo innotuit, quin Gemma adumbret, ne dubitare quidem possis. Res aperta est, inquit ETASTES, & miror animadversam non esse. In Gemma septima, perrexit DULODORUS, non minor negligentia est. Salutem arbitrantur, citato n. 39. Sed magna utrinque est differentia. Numero 39. Serpens bacillo circumvolvitur, sed hic capite deorium versò papillam mordet, adeo ut Cleopatram hanc, aut aliam quandam Aspidis morsu deficientem foeminam omnino agnoscere debeamus. Nisi fallor, excepit ETASTES, etiam ex vultu moribunda intelligitur. Quid autem Gemma octava, nonne Avem ea expressam cum Gorlaeus alitem Jovis explanaret, ex rostro corvum esse, acutè omnino demonstratum est? Cornicem ego statuo, respondit DULODORUS, qui Concordiæ Maritalis symbolum fuit. Hoc ut arbitrer, adjectum sceptrum mihi suader, cum hoc Junonis insigne sit, Nuptiarum Prædis, id quod pluribus apud Gyraldum deducitur. Sed alia succedunt:



Onyx



Onyx



Piet.



Iv.



S. r.



S. r.



S. r.



S. r.

In prioribus, subjecit ETASTES, Herculem video, quid autem hic erratum sit, non video. At faxo ut videas, regessit DULODORUS. In *prima* Gemma Hercules à Pomo Hesperidum petito redux statuitur, cum tamen Hercules hic, non Pomum, sed Pateram prætendat, adeoque Herculem sacrificantem adumbret, qualis & in Gemma *secunda* ad aram visitur. Si Patera & Pomum discerni non potuere, at ex fabula debuisset innotuisse, Herculem tria Poma ex hortis Hesperidum retulisse, quot etiam in Numismate Hadriani Hercules Gaditanus præfert. De Sacrificio, inquit ETASTES, res nota est; In Gemma *secunda* enim Hercules in Oeta sacrificans exhibetur: nisi, quod habitus non conveniat, potius ad eum respiciendum arbitreris, qui in Græcia Goltzii T. 3. sub titulo ΧΑΩΝΙΤΩΝ proponitur, vel ad Tyrium apud Vaillantium T. II. pag. 69. In Numismate ΧΑΩΝΙΤΩΝ, respondit DULODORUS, Hercules non stat, nec pateram præfert, sed pelli Leoninæ insidens, ex Scypho liquorem fundit, proserpente, à pedibus hederà: adeo ut liquido constet, ad Herculis bibacitatem id Numisma referendum esse. Tyrionum Hercules in Nummo Macrini effectus est, eodem quidem modo, quod in Gemma *prima* visitur; Cum autem non se, sed Tyrios referat, pro Salute Principis sacrificantes, ea autem consideratio in Gemma locum non habeat, omnino censerem, Herculis pietatem hic adumbrari, quā in Italia, Caco interfecto, & ab Evandro agnitus, Jovi patri aram crexisse & sacrificasse, Antiquitatum Romanarum Scriptoribus memoratur. Sed hac levia sunt. An reliqua graviora? interrogavit ETASTES? Sunt, respondit DULODORUS; Quis enim ad Gemmam *tertiam* credat, Herculem Antæi pelle amictum, cum Patera frugibus plena ad Sacrificandum procedere? At, inquit ETASTES, nisi fallor Tristanus assertum sulcit. Tristanus, reposuit DULODORUS, Herculem paciferum cum ramo Oleæ exhibet, sed cum pelle Antæi non exhibet. Antæum enim Hercules pelle spoliasse non legitur, sed legitur eum suffocasse, id quod & in Gemma *quarta* facit. In Gemma *quarta* subjecit ETASTES; At raptum in hac vel puellæ adumbrari, vel pueri credebam. Antæum, excepit DULODORUS, ab Hercule suffocatum hoc schemate adumbrari, non tantum ex fabula constat, quā sublimem è terra, ulnisque elisum Hercules interemisit, Apollodoro memoratur; sed & ex Numismate HERCULI LYBICO inscripto, in quo licet directus, medium tamen apprehendit, & è terra sublimem suffocat: Ut taceam MSCrum Pighianum, in quo eodem ferè modo aliquoties occurrit, eò ubique Antæi, utpote morientis, angore & vehementia, qualem & in Gemma ad oculum cernimus. Ad Gemmam *quintam* transeamus, inquit ETASTES, mirum si & hic erratum fuerit, Liceti enim placita innotuere, & si probari meruissent, utique ab iis non debuisset recedi. Rectè iudicas, respondit DULODORUS; Cum autem recessum sit, apertum est, ea probata non esse. Asinus hic palleatus ad duos palleatos accedens statuitur, cum tamen non duo palleati, sed omnino duæ foeminae, aut verius foemina cum Ancilla, in Gemma ex habitu noscantur, adeoque planum sit, omnino cum Liceto sentiendum esse, qui Apulej. in Asinum mutati petulantem lasciviam agnoscit, quā mulieribus ostensus adeo placuit, ut & concubitus ejus licitarentur. Aperta sunt, & propositæ Gemmæ convenientissima Apuleji verba. Quod contra adferam, inquit ETASTES, non habeo. Quid autem ad Gemmam *sextam*? An falsum est quod dicitur Proserpinam ea exhiberi?